

# JESUCRISTO

## bachá niráa machírali echi

### JUANI

#### mapurigá ikimea echalí ne jubá rawé

---

**1** Echi Walubela Riosi Onorúami je'ná jerigá riwírali echi Walubela Jesucristo, mapurigá Binói ayénachó echirigá machírama echi jaré Binói níwala galá bichíyami pagótami mapu Binói piónowala niráa ju, mapurigá aboni galá machimea suwaba mapurigá ke 'me ayó echirigá ikimea. A'lí Jesucristo júuli bilé Binói kapitánawala tamí je'ná jerigá riwíranala, mápuni Juani riwéami ju, mápuni Jesucristo piónowala niráa ju. <sup>2</sup>A'lí nijeni nawésaga ruyé echi auché jaré pagótami ne suwaba mapu ikini echirigá riwali. A'lí ne suwaba mapu ikini echirigá ruyé, ne bichíwali ju. Ayénachó nijeni we nawesa Riosi Ra'fchala, jeanigá mapu ne Bichíwali ju, ayénachó mapu Jesucristo nawésawala ne Bichíwali ju.

<sup>3</sup>Ne galá kaníliami níлага mapuyíripi galá 'néniga machiko je'ná mapurigá osirúami ju, ayénachó galá kaníliami níлага si'néami mapu ikí galá kipunuko mapalí auché bilé galá 'néniga ruyé aboni je'ná jerigá mapurigá osirúami ju, mapalí aboni ayénachó galá nijéwaga olá mapurigá je'ná jerigá osirúami ju, mapujiti ke 'me ayó ne suwaba achigórigá ikimea mapurigá jena'í osirúami ju.

#### **Echi Juani oseli kicháona piréami napawika bichíyami ritémtami**

<sup>4</sup>Nijé Juani je'ná jerigá osé echi jaré napawika bichíyami, kicháona napawíami, echo'ná Ásiachi anilíwachi kawíralí. Ne wabeni nakí mapu Riosi Onorúami 'yemi mi waminabi ne wabé ku'wírama, ayénachó mapu Binói 'yemi mi 'yama mapurigátamo kilí ologá pirélabo. Echi Walubela Riosi ne wabé Walubela ju jipi rawé, ayénachó ki'yá chokichí ne Walubela níli, ayénachó Binói ne Walubela níima ne sinibí niráa. Ayénachóni nakí mapu echi Wabé Galabé Riosi Iwigala 'yemi mi echirigá 'yama. A'lí echi Wabé Galabé Riosi Iwigala ne wabé simírami galabé ju, kicháosa yenasí simírami, ayénachó echi Wabé Galabé Riosi Iwigala echo'ná bacháami Riosi yuwa atí, echo'ná wabé ripabé Binói asíbalachi. <sup>5</sup>Nijeni ayénachó nakí mapu Jesucristo echirigá 'yemi mi 'yama. Echi Walubela Jesucristo sinibí ne Bichíwali aní. Chabé ki'yá mapalí Binói mukúami níli, echalí Jesucristo ne bachá ku owínali mapurigá ne si'néami echi jaré galá bichíyami ritémtami mapu ikí ma suwíami ju, ayénachó ku o'wínama waminánomí. Echi Walubela Jesucristo nuléami ju ne si'néami echi jaré o'wéala jena'í wichimóbachi piréami yuwa. A'lí Jesucristo tamujé tamí ne wabé galigá ku bi'wama Binói lalá jiti, ne suwaba mapurigata chati olali, mapujiti

Binói wabé léntiga mi'lirúami níli tamujé chati olalila jiti. <sup>6</sup> Ayénachó Jesucristo ma tamujé tamí jáwali mapurigata o'wéala niráa níbo Riosi yuwa, mapurigata chopi olabo mapurigá Riosi nakí, echi mapu Jesucristo Onolá ju. A'lí echi bilepi Jesucristo tamujé tamí jáwali mapurigata olabo mapurigá sacerdote niráa Riosi yuwa. ¡Galá níma mapurigá Jesucristo sinibí niráa waminabi walubéraga anérami níma ne sinibí niráa! ¡Echirigá nílaga!

<sup>7</sup> ¡Galá machisí mapurigá Jesucristo echo'ná ripana nolírali ku nolínama, jena'í wichimóbachi ku nawayá! Echálí ne si'néami pagótami jena'í wichimóbachi tibíami galá riwimea Binói echirigá ku nawáachi. A'lí echi jaré rijói mapu clavo jiti michónali Jesucristo echo'ná kúrsichi ayénachó galá riwimea Binói echirigá ku nawáami. Echálí ne si'néami pagótami mapu ikí abijí tibímako jena'í wichimóbachi, ne wabé majaga, wabé nalákama mapalí aboni riwimea Jesucristo echirigá ku nawáachi. Ne bichíwali echirigá ikimea.

<sup>8</sup> Echi Walubela Jesucristo mapu ne suwaba omériami ju, Échiko je'ná jerigá aní: Nijeni ne bachá niráa ju, mapurigá echi binékowami “A” anilíwami ne bachá ju, ayénachóni ne jubá níma, mapurigá echi binékowami “Z” anilíwami ne jubá ju.

Echi Walubela Jesucristo arigá bitéami ju jipi rawé, ayénachó Binói bitéali kí'yá chokichí, ayénachó ke 'me ayó Binói auchecho siné ku nolínama jena'í wichimóbachi.

#### **Echi Juani mapurigá rimuka niráa riwali Jesucristo ne wabé Walubela niráa**

<sup>9</sup> Nijé, Juani, 'yemi rijimala juni mápuni galá bichí Jesucristo niráa, ayénachó nijeni achigórigá risúu olárami ju mapurigá 'yemi niráa, chópini arigá wabé walubératami níma achigórigá mapurigá 'yémitamo wabé o'wéalatami níbo Jesucristo yuwa waminánomí. Ayénachó nijeni kilí ologá bité achigórigá mapurigá Riosi 'yemi mi 'ya máputamo kilí ologá piré. <sup>10</sup> A'lí siné oméachi rawé echi Wabé Galabé Riosi Iwígala tamí machírali je'ná jeyiri namuti: Echálí nijeni ke sayiná námali kuwana ripopa bilé wabé iwéami Ra'íchami, ne wabé anéami mapurigá bilé korneta niráa, <sup>11</sup> mapu tamí jeaneli: Nijeni ne bachá ju, mapurigá echi binékowami “A” anilíwami ne bachá ju, ayénachóni ne jubá níma mapurigá echi binékowami “Z” anilíwami ne jubá ju. Biléana oselichi osá suwaba mapu ikimi ritiwá. A'lí náali echo'ná kicháona napawika bichíyamichi echo'ná Ásiachi anilíwachi kawírali. Echirigá náawali echo'ná Ejesochi anilíwachi, echo'ná Esamírnachi anilíwachi ayénachó, echo'ná Pérgamachi anilíwachi ayénachó, echo'ná Tiatírachí anilíwachi ayénachó, echo'ná Sálisichi anilíwachi ayénachó, echo'ná Jilaréjiachi anilíwachi ayénachó, echo'ná Laoriséachi anilíwachi asíchiko. <sup>12</sup> A'lí bicheni jubá okuá ku kuwana 'neli mapu Chigá tamí ra'íchali. Echalini echo'ná riwali kichao oro niwárami, echi rajilí jawálawami. <sup>13</sup> Ayénachó echo'ná mapo'ná echi kichao rajilí jawálawami jari nijeni riwali echo'ná nasipa wilíami echi Walubela Jesucristo, echi mapu wi'lí napáchami níli ronochí yénasí sébami; ayénachó bilé mapuyiri puli, oro niwárami, echo'ná Binói sulálachi ayé norigá bulérami níli. <sup>14</sup> Ayénachó Binói kupala ne wabé simírami rosákami níli, mapuyiri bo'osali ne wabé rosákami, mapurigá kipá niráa. A'lí Binói busila ne wabé ratábami níli mapurigá walú rajáami niráa. <sup>15</sup> A'lí Binói ralala ne wabé ratábami níli, mapurigá bilé namuti mapuyiri jiero lánami, mapurigá echi pagótami ne wabé simírami ratabáchaka, waminá basúnaga, ne wabé simírami ratábami niwá. A'lí mapalí echi Walubela Jesucristo ra'íchali, echálí ne wabé iwéami anéami níli, mapurigá sinepi niráa ne wabé simírami ané wikanáami bakochi.

<sup>16</sup>A'lí Binói wilili kichao sopolí echo'ná Binói sikálachi watoná. A'lí echo'ná Binói chumulachi jonsa machínali bilé wi'libé ripiyá, okoná oláami. A'lí Binói cho'olá ne wabé ratábami níili mapurigá echi rayénali niráa, mapalí ne wabé galá rayena.

<sup>17</sup>A'lí mapalí nijeni riwali, echalí echo'ná bacháami mapo'ná Jesucristo wi'lili, nijeni ri'lé bu'wíbbali mapurigá ma mukúami niráa, mapujiti Binói ne wabé ratábami níili. A'lí nijeni ketasi omérali waminabi 'néniya. Echalí Jesucristo tamí nochali Binói sikala jiti. A'lí Binói tamí jeaneli: Ketasi majá. Nijeni ne bachá ju, ayénachóni ne jubá níima. <sup>18</sup>Nijeni ju mápuni sinibí bité. Chabénala Nijeni waminá mukuli, chopi jípi ni ma ku bitéami ju, ne sinibí niráa. A'lí Nijeni wabé omériami ju mapurigani nulama mapurigá echi jaré pagótami waminá suwimea, ayénachóni níwa echi jaré irápala mapurigani ku irápama echo'ná mapo'ná echi jaré suwíami 'yératami ju. <sup>19</sup>Jipi biléana oselichi osá suwaba mapu ikimi riwali. Echirigá osá suwaba echi jaré namuti jiti rugá mapu ikí nirú jipi rawé, ayénachó osá echi auché jaré namuti jiti rugá mapu ikí ikimea waminánomí. <sup>20</sup>Je'ná jerigá aniwáami ju echi jaré kichao sopolí mápumi riwali watoná nijé sikálachi, ayénachó je'ná jerigá aniwáami ju echi kichao oro niwárami, echi rajilí jawárawami: Echi jaré kichao sopolí echi kichao Riosi kapitánawala ju, mapu Nijeni júuli tibúnala si'néami echi jaré napawika bichíyami ritémtami echo'ná kicháona o'wéalachi piréami. A'lí echi kichao oro niwárami, echi rajilí jawárawami, echi ju ne si'néami echi jaré napawika bichíyami ritémtami echo'ná kicháona o'wéalachi piréami.

**Jesucristo nuleli echi Juani osénala echi jaré napawika  
bichíyami echo'ná Ejésuchi piréami**

**2** Echalí echi Walubela Jesucristo waminabi tamí jeaneli: Mujé, Juani, je'ná jerigá osé echi walula Riosi kapitánawala mapu galá tibuta echi jaré napawika bichíyami echo'ná Ejésuchi piréami, mapurigá échiko jerigá ruyema si'néami aboni: Echi Walubela Jesucristo wilí kichao sopolí echo'ná Binói sikálachi watoná, ayénachó Binói echo'ná nasipa iyena mapo'ná echi kichao rajilí jawálawami jawi. Échiko 'yemi mi je'ná jerigá ané: <sup>2</sup>Nijeni galá machí suwaba mapurigátamo olá. Nijeni galá machí mapurigátamo ne wabé simírami nocha, ayénachó mapurigátamo galá kilí ologá piré. Ayénachóni galá machí mapurigátamo ketasi wi'lí anacha echi jaré chati oláami pagótami yuwa 'yena. Nijeni galá machí mapurigá 'yémitamo bachá niráa galá rukugá machili echi jaré mapu 'yékkaka chopi aní mapu Nijeni júuli aboni nawisánala. Echirigátamo galá machili mapu echi jaré aboni ne wabé 'yékkami ju, mapujiti Nijeni ketasi júuli aboni nawisánala. <sup>3</sup>'Yémitamo kilí ologá anáchali mapalítamo wabé risúu olárami níili mapujítitamo tamí bichíili, ayénachótamo ma ne wabé nóchali, Nijé nóchala olayá. A'lí bichétamo ketasi ariweli bichiya, chópitamo waminabi nokuífsali Nijé nóchala olayá. <sup>4</sup>Chopi Nijeni 'yemi mi wi'nijí mapujiti jípitamo ketasi ne wabé simírami tamí galé, mapurigátamo tamí galeli chabé chokichí. <sup>5</sup>Echijiti galá ku 'natasi mapurigátamo ma ke 'me tamí galé, mapurigátamo chabé chokichí ne wabé simírami tamí galeli. Jipi auchecho tamí echirigá wabé simírami galesi. Suwaba auchécho galabé olasi mapurigátamo galabé olali chabé chokichí, mapujiti átamo ketasi echirigá olásagá, Nijeni ke 'me ayó ku nawama echo'ná 'yémmichi. A'lí Nijeni ku 'yema echi oro niwárami rajilí wilalíwami, átamo ketasi tamí auchecho ku wabé simírami galésagá; mapujiti átamo ketasi tamí galésagá 'yémitamo arigá ketasi galá tamí bichíi, napawika

bichíyami niráa. <sup>6</sup>Chópitamo arigá je'ná galá olá, máputamo we kichí mapurigá olá echi jaré mapu wabé binera chuwé ologá piréranala echi auché jaré pagótami, mapurigá echi bilé Nikolasi riwéami rijói we binérali. Nijeni ayénachó wabé kichí aboni olalila. <sup>7</sup>Si'néami 'yemi máputamo námiami juko, galá namsi mapurigá echi Wabé Galabé Riosi Iwigala jeané echi jaré napawika bichíyami ritémtami: Ne si'néami echi jaré pagótami mapu ikí tamí bichíiko, abóniko galá nayura. A'lí Nijeni 'yama mapurigá aboni ko'mea echi bilé namuti rakala mapu ichirúami ju echo'ná ripá riwigachi, echi mapu galá nijá mapurigá sinibí niráa pirélama si'néami mapu ikí ko'wako echi raká.

**Jesucristo nuleli echi Juani osénala echi jaré napawika  
bichíyami ritémtami echo'ná Esamírnachi piréami**

<sup>8</sup>Ayénachó echi Walubela Jesucristo tamí jeaneli: je'ná jerigá osé echi walula Riosi kapitánawala mapu galá tibuta echo'ná Esamírnachi piréami napawika bichíyami ritémtami mapurigá échiko je'ná jerigá ruyema ne si'néami aboni: Nijeni ne bachá ju, ayénachó Nijeni jubá níma. Nijeni chabénala waminá mukuli, chópini auchecho ku bitéali. Nijeni 'yemi mi jeané: <sup>9</sup>Nijeni galá machí suwaba mapurigá 'yémitamo olá. Galani machí mapurigátamo wabé risúu olárami ju, ayénachóni machí mapurigá 'yémitamo ne wabé tisúwati ju, chópitamo arigá ne wabé níwami ju Riosi yuwa. Ayénachóni galá machí mapurigá echi auché jaré 'yemi mi ne wabé sitila ané. Echi jaré aboni ne wabé nóchaga aní mapu aboni Juríosi pagótami ju, chopi aboni ketasi ne bichíwali Juríosi pagótami niráa ju. Abóniko chopi napawika niráa we o'wikéami ju echi Satanasi riwéami riablo. <sup>10</sup>Ketasi majasi mapurigátamo karúmati jiti risúu olárami níibo waminánomí, mapujiti echi riablo ne bichíwali 'wérali olama mapurigá jaré 'yemi pachá mo'wárami níibo echo'ná kumurachi, mapurigá si'néami 'yemi wabé risúu olárami níibo makói rawé iyénasí. Chopi sinibí galá bichíisasi mapuyénasítamo waminá suwí, a'lí Nijeni 'yemi mi kóoga 'yama mapurigátamo sinibí niráa ku pirélabo. <sup>11</sup>Si'néami 'yemi máputamo námiami juko, galá namsi mapurigá echi Wabé Galabé Riosi Iwigala jeané echi jaré napawika bichíyami ritémtami: Ne si'néami echi jaré pagótami mapu ikí bichíiko Jesucristo niráa, abóniko galá nayura, a'lí aboni tarapé risúu olárami níma echalí ne jubá rawé, mapalí echi auché jaré ke bichíyami pagótami walú kastigo 'yárami níma.

**Jesucristo nuleli echi Juani je'ná jerigá osénala echi jaré napawika  
bichíyami ritémtami echo'ná Pérgamachi piréami**

<sup>12</sup>Ayénachó echi Walubela Jesucristo tamí jeaneli: Je'ná jerigá osé echi walula Riosi kapitánawala mapu galá tibuta echo'ná Pérgamachi piréami napawika bichíyami ritémtami, mapurigá échiko je'ná jerigá ruyema ne si'néami aboni: Nijeni níwa echi wi'llibé ripiyá, okoná oláami. Nijeni 'yemi mi jeané: <sup>13</sup>Nijeni galá machí suwaba mapu ikí 'yémitamo olá, ayénachóni machí máputamo piré echo'ná biléana walúlachi mapo'ná echi Satanasi riwéami riablo we nulé echo'ná piréami pagótami mapurigá aboni walúlawala niráa, chópitamo sinibí arigá galá bichííga nawesa jeanigá máputamo galá tamí bichíí. A'lí bichétamo ketasi siné ariweli tamí bichiya, nibilé chótamo ariweli echalí rawé mapalí echi Antipasi riwéami rijimala waminá mi'lirúami níili echo'ná 'yemi walúlawalachi, mapo'ná echi Satanasi riwéami riablo we nuláami ju. A'lí echi Antipasi chopi echirigá mi'lirúami níili mapujiti binói

sinibí galá bichíwaga nawésami níli Nijé Ra'íchala. <sup>14</sup>Chopi Nijeni arigá 'yemi mi wi'nijí pe okuáa namuti jiti: Jaré 'yemi arigá olá mapurigá echi Balami riwéami rijói binérali olánala, mapujiti échiko binérali echi Balaka riwéami walula silfami mapurigá binói chati olírama echi jaré Isaeli pagótami mapuyénasí aboni arigá ko'wali echi jaré namuti mapu bachá niráa 'yárami níli echi jaré amachíkarawami namuti, ayénachó mapuyénasí aboni wabé chati ologá chuwé bilétali yuwa kochili. <sup>15</sup>Ayénachó echo'ná 'yémichi nirú jaré mapu we binera echi auché jaré pagótami chuwé ologá pirélanala, mapurigá echi Nikolasi riwéami rijói olali. A'lí Nijeni we kichí echirigá binékowami. <sup>16</sup>Echijiti si'nú, bukulíwami ku galabé 'nátaga ku ro'wisi Riosi yuwa. A'lí átamo ketasi echirigá olásagá, Nijeni ke 'me ayó nawama echo'ná 'yémichi. Echálí Nijeni sayérama echi jaré mapu arigá olá mapurigá echi Nikolasi riwéami rijói binera. Nijeni sayéraga nikoma aboni echi wi'libé ripiyá jiti mapu okoná oláami ju, echi mapu Nijé chumulachi jonsa machina. Echirigá aniwáami ju mapu Nijeni nikoma aboni sayéraga, Nijé Ra'íchala jiti. <sup>17</sup>Si'néami 'yemi máputamo námiami juko, galá namsi mapurigá echi Wabé Galabé Riosi Iwigala jeané echi jaré napawíkami bichíyami ritémtami: Ne si'néami echi jaré pagótami mapu ikí galá tamí bichíiko, abóniko galá nayura, a'lí Nijeni 'yama mapurigá aboni ko'mea echi ko'wáami, ripá riwigachi jonsa nawáami, maná anilíwami, echi mapu chiná nasótami ju. Ayénachóni 'yama ne si'néami iblípi rité tosákami. A'lí echo'ná ibílana ritérali auché si'nú ne bukulíwami riwalá osirúami níima, echi mapu ketasi wesi machimea. A'lí echi mapu naré, échiko chopi galá machimea.

**Jesucristo nuleli echi Juani je'ná jerigá osénala echo'ná  
Tiatírachi piréami napawika bichíyami ritémtami**

<sup>18</sup>Ayénachó echi Walubela Jesucristo tamí jeaneli: Je'ná jerigá osé echi walula Riosi kapitánawala mapu galá tibuta echo'ná Tiatírachi anilíwachi piréami napawika bichíyami ritémtami, mapurigá échiko je'ná jerigá ruyema ne si'néami aboni: Nijé ju echi Walubela Riosi Ranala mápuni wabé ratábami niráa busé mapurigá rajáami niráa, Nijeni ayénachó ne wabé ratábami ralé mapurigá bilé namuti mapuyiri jiero lánami, mapurigá echi pagótami ne wabé ratabáchaka, waminá basúnaga, ne wabé simírami ratábami niwá. Nijeni 'yemi mi jeané: <sup>19</sup>Nijeni galá machí suwaba mapu ikí 'yémitamo olá, máputamo ne wabé galéami ju, ayénachó máputamo galá tamí bichíi, ayénachó máputamo we nocha, Nijé nóchala olayá, ayénachó máputamo galá kilí ologá piré. Ayénachóni machí mapurigá jípitamo ne wabé simírami olá, ketasi mapurigátamo olali chabé chokichí mapalítamo bachá niráa tamí bichíili. <sup>20</sup>Chópini 'yemi mi wi'nijí bilé namuti jiti: 'Yémitamo arigá ariwé mapurigá echi we chati oláami mukí, Jesabeli riwéami, we binéraga chati olírata echi jaré Nijé níwala pagótami, mapurigá aboni chuwé bilétali yuwa kochimea, ayénachó mapurigá aboni we ko'wá echi jaré namuti mapu bachá niráa 'yárami níli echi jaré amachíkalawami namuti. A'lí echi Jesabeli we 'yékaka aní mapu binói galabé nawesa Riosi Ra'íchala, chopi ketasi bichíwali ju. <sup>21</sup>Nijeni wi'libé rawé buweli mapurigá echi mukí si'nú, bukulíwami ku galabé 'nátaga ku ro'wima tamí yuwa, chopi binói ketasi chirigá nakili ku ro'wínala tamí yuwa, chopi wabé chati chuwé olánali mapurigá echi pagótami chati olá mapalí aboni chuwé bilétali yuwa we kochí. <sup>22</sup>Jipi Nijeni ne wabé nayútama echi mukí mapurigá binói chopi nayúu bu'wimea echo'ná biléana jubechi. Ayénachóni ne wabé risúu

nílatama si'néami echi jaré rijói mapu ne wabé chati ologá kochiko echi mukí yuwa. Echirigani olama a aboni ketasi si'nú, bukulíwami ku galabé 'nátaga ku ro'wisa tamí yuwa, mapurigá aboni echirigá ariwema chati olayá mapurigá echi mukí we chati olá. <sup>23</sup> Ayénachóni ko'wimea echi mukí kúchuwala. A'lí ne suníami piréami napawika bichíyami ritémtami galá machimea mapu Nijeni wabé simírami machíami ju echi jaré pagótami 'nátawala, mapalí aboni chiná niráa 'nata aboni sulálachi. A'lí Nijeni 'yemi mi ibili niráa kastigo 'yama, achigórigá mapurigátamo chati olali. <sup>24</sup> A'lí echi jaré mapu ikí bichíili mapurigá echi wabé chati oláami mukí binérali, abóniko aní mapu echi ne wabé simírami chati 'natálawami arigá galá ju, mapujiti echi ne wabé 'nátami Satanasi riwéami riablo 'nátawala ju. Chopi auché jaré 'yemi echo'ná Tiratírachi piréami ritémtami ketasi bichíili mapurigá echi chati oláami mukí binérali, nibilé chótamo machili echi wabé simírami chati 'natálawami. Jipi Nijeni 'yemi mi ané mápuni ketasi 'yemi mi 'yama auché jaré isena nulalíwami. <sup>25</sup> Chopi mapurigá Nijeni ma 'yemi mi nuleli, echirigá galá nijéwaga olasi mapuyénasí Nijeni ku nawama. <sup>26</sup> Ne si'néami echi jaré pagótami mapu ikí tamí bichíiko, abóniko galá nayura. Echijiti Nijeni jawama, o'wéala niráa, ne si'néami aboni mapu ikí sinibí galabé olako mapurigá Nijeni nakí mapurigá aboni olama, mapuyénasí aboni piré jena'í wichimóbachi. Echalí Nijeni jawama aboni mapurigá o'wéala niráa, mapurigá aboni nulema echi auché jaré pagótami ne suníami jena'í wichimóbachi piréami, <sup>27</sup> achigórigá mapurigá Nijé Onolá tamí wilali mapurigá Walubela niráa, mapurigani nulema jena'í wichimóbachi piréami pagótami mapurigá aboni Walubélawala niráa. Echalí aboni nulema echi auché jaré pagótami mapurigá ne wabé o'wéala niráa, ayénachó aboni ne wabé omériga olama mapurigá bilé rijói wipisoka mojuana bilé sikolí, bilé bareta jiti. <sup>28</sup> A'lí Nijeni ayénachó 'yama aboni echi walú sopolí ri'lisópali mapu bi'yá bijí machina. <sup>29</sup> Si'néami 'yemi máputamo námiami juko, galá namsi mapurigá echi Wabé Galabé Riosi Iwigala ané echi jaré napawika bichíyami.

**Echi Walubela Jesucristo nuleli echi Juani je'ná jerigá osénala  
echo'ná Sárísichi piréami napawika bichíyami ritémtami**

**3** Ayénachó echi Walubela Jesucristo tamí jeaneli: Je'ná jerigá osé echi walula Riosi kapitánawala mapu galá tibuta echo'ná Sárísichi anilíwachi piréami napawika bichíyami ritémtami, mapurigá échiko je'ná jerigá ruyema ne si'néami aboni: Nijeni suwaba níwa echi Wabé Galabé Riosi Iwigala, ayénachó Nijeni chapísá wilí echi kichao sopolí Nijé sikálachi niráa. Nijeni 'yemi mi jeané: Nijeni galá machí ne suwaba mapurigá 'yémitamo olá. Nijeni machí máputamo ketasi sinibí piréami ju, chopi echi auché jaré pagótami mayé máputamo arigá ologá piré mapurigá Nijeni nakí máputamo olabo. <sup>2</sup> Ne galá 'nagá, galá 'nátami nílasi, mapujiti 'yémitamo ketasi 'me galabé oláami ju. 'Yémitamo péebi galá olá, chopi jipi jonsa sinibí ne wabé galabé olasi, mapujiti Nijeni ma riwali mapu 'yémitamo ketasi ne sébali galabé oláami ju bacháami Riosi yuwa. <sup>3</sup> Galá ku 'natasi mapurigátamo ma binératami níili Riosi Ra'fchala. Ayénachó echirigá galabé olasi mapurigátamo binératami níili. Si'nú bukulíwami ku galabé 'nátaga ku ro'wisi Riosi yuwa, mapujiti átamo ketasi echirigá olásagá Nijeni ku nawagá 'yemi mi ke sayiná kastigo 'yama, mapurigá bilé chigórami ke sayiná nawá, a'lí bichétamo ketasi machí mapu chuyénako Nijeni echirigá ku nawama. <sup>4</sup> Chopi pe okuáa 'yemi echo'ná Sárísichi piréami ketasi



chónali 'yemi napáchala. Echirigá aniwáami ju mapu echi jaré pe okuáa 'yemi ketasi echirigá chati ologá piréali. Echijiti aboni ne wabé rosákami napáchaga tamí yuwa 'yénama echo'ná ripá riwigachi. A'lí galá ju mapu Nijeni echirigá 'yama, mapujiti aboni ketasi chati ologá piréali. <sup>5</sup>Ne si'néami echi jaré pagótami mapu ikí galá tamí bichíiko, abóniko galá nayura. A'lí Nijeni 'yama mapurigá aboni ne galá tosákami napáchama echo'ná ripá riwigachi. A'lí aboni riwalá oselichi osirúami ju echo'ná ripá riwigachi. A'lí biché aboni sinibí niráa tamí yuwa pirélama echo'ná. A'lí Nijeni ke siné ku bi'wama aboni riwalá echo'ná osirúami, chopi Nijeni anema echi keni Onó mapu ibili aboni Nijé níwala ju, ayénachóni echirigá anema echi jaré o'wéala Riosi kapitánawala. <sup>6</sup>Si'néami 'yemi máputamo námiami juko, galá namsi mapurigá echi Wabé Galabé Riosi Iwigala ané echi jaré napawika bichíyami.

**Jesucristo nuleli echi Juani je'ná jerigá osénala echo'ná  
Jilaréjiachi piréami napawika bichíyami**

<sup>7</sup>Ayénachó echi Walubela Jesucristo tamí jeaneli: Je'ná jerigá osé echi walubela Riosi kapitánawala mapu galá tibuta echo'ná Jilaréjiachi piréami napawika bichíyami ritémtami, mapurigá échiko je'ná jerigá ruyema ne si'néami aboni: Nijeni ne wabé simírami galabé ju, ayénachóni ne wabé bichíwali ju. Nijeni bilé ju echi walula silíami Rabiri riwéami kúchala kúchuwala. Nijeni ne Walubela Silíami níima jena'lí wichimóbachi, echo'ná ripá riwigachi ayénachó. Echijiti mapalí Nijeni ma irapa, ke wesi omero ku 'yéria, ayénachó mapalí Nijeni ku 'yérama, ke wesi omero ku irápia. Ayénachómi jeanema mapu Nijeni je'ná jerigá ané: <sup>8</sup>Nijeni galá machí suwaba mapu ikí 'yémitamo olá. 'Yémitamo ketasi 'me jiwériga olá chópítamo arigá galá bichíli Nijé Ra'íchala, ayénachótamo galá nawésali jeanigá máputamo galá tamí bichíi. Echijiti echo'ná bacháami mapo'ná 'yémitamo simárabo, echo'ná Nijeni ma irápali biléana yéachi, a'lí ke wesi omérama ku 'yéria. <sup>9</sup>Auché jaré chati oláami pagótami we napawí echi Satanasi riwéami riablo o'wikénala. Abóniko we aní mapu aboni Jurfosi anilíwami pagótami ju, chopi aboni ketasi ne bichíwali echirigá ju. Aboni chopi wabé 'yéka echi echirigá aní. Nijeni olama mapurigá aboni echo'ná bacháami 'yemi napawika bichíyami yuwa sigá chokoba jábama. Echirigani olama mapurigá aboni galá machímea mapu Nijeni 'yemi mi ne wabé galeli. <sup>10</sup>'Yémitamo ma galá nijéwali Nijé nulalila, mapurigá Nijeni 'yemi mi nuleli kilí ologá pirélanala. Echijiti Nijeni 'yemi mi tibútamo mapurigátamo ketasi risúu olárami níibo echalí ne jubá rawé mapalí echi auché jaré ne suníami jena'lí wichimóbachi piréami echirigá ne wabé simírami risúu olárami níima. <sup>11</sup>Nijeni ke sayiná, we yáa ku nolínama. Sinibí waminabi galabé niráa bichíisasi 'yemi, mapurigátamo ma tamí bichíili, mapurigá ke wesi omérama 'yemi mi chati olíriya, mapujiti a echirigá ikísáagá 'yémitamo ketasi narepo echi wabé galabé nijíwami mapu Riosi nakili 'yemi mi 'yánala. <sup>12</sup>Ne si'néami echi jaré pagótami mapu ikí tamí bichíiko, abóniko galá nayura. A'lí Nijeni jawama aboni bacháami tamí yuwa mapurigá aboni sinibí tamí yuwa muchima. A'lí aboni echirigá ne wabé jiwératami níima mapurigá jaré o'weli toni niráa, echo'ná walubé Riosi ri'obáwalachi jawárami. A'lí aboni sinibí niráa echo'ná Riosi yuwa muchima. A'lí echo'ná íbilana abónichi Nijeni osimea echi Nijé Riósawala riwalá, ayénachó Nijeni echo'ná íbilana abónichi osimea echi Nijé Riósawala níwala walúlachi riwalá, echi mapu Bukulíwami Jerusalémachi anilíwachi ju. A'lí echi Riosi níwala walúlachi

echo'ná ripá riwigachi jonsa nawáami ju, echo'ná jonsa mapo'ná Riosi atí. A'lí Nijeni ayénachó osimea echo'ná ibílana abónichi Nijé Binói riwalá ne bukulíwami. <sup>13</sup> Si'néami 'yemi máputamo námiami juko, galá namsi mapurigá echi Wabé Galabé Riosi Iwigala ané echi jaré napawika bichíyami.

**Jesucristo nuleli echi Juani je'ná jerigá osénala echo'ná  
Laoriséachi anilíwachi napawika bichíyami**

<sup>14</sup> Ayénachó echi Walubela Jesucristo tamí jeaneli: Je'ná jerigá osé echi walula Riosi kapitánawala mapu galá tibuta echo'ná Laoriséachi piréami napawika bichíyami ritémtami, mapurigá échiko je'ná jerigá; ruyema ne si'néami aboni: Nijeni ne wabé Bichíwali ju, ayénachó Nijeni sinibí niráa ne wabé bichíwaga aní. A'lí Nijeni níli mapu ki'yá chokichí niwáli ne suwaba namuti mapu ikí Riosi niwáli. Nijeni 'yemi mi jeané: <sup>15</sup> Nijeni galá machí suwaba mapu ikí 'yémitamo olá. Galani machí mapu 'yémitamo ketasi tamí kichí, ayénachó máputamo ketasi tamí wabé galé. Echijiti 'yémitamo ketasi mapurigá echi ba'wí ruláami ju mapu Nijeni we nakí bajínala; nibilé chótamo mapurigá echi ba'wí ratáami ju mápuni ayénachó we nakí bajínala, chópitamó mapurigá echi ba'wí péebi ratáami niráa ju, mapu tarapé ra'fami ju. A'lí átamo ketasi tamí wabé galésagá, galá níima máputamo arigá tamí kichisa, chopi máputamo ketasi níibo mapurigá echi ba'wí péebi ratáami niráa, mapu tarapé ra'fami ju. <sup>16</sup> Chopi mapujiti 'yémitamo ketasi tamí wabé galé, ayénachó mapujítitamo ketasi tamí kichí, 'yémitamo chopi mapurigá echi ba'wí péebi ratáami niráa ju, mapu tarapé ra'fami ju. Echijiti Nijeni 'yemi mi waminá waná muchuwama, achigórigá mapurigá Nijeni machí pasá echi ba'wí péebi ratáami echo'ná Nijé riníflachi jonsa, mapujiti ketasi ra'fami ju. <sup>17</sup> Nijeni 'yemi mi echirigá waná muchuwama mapujítitamo aní máputamo ne wabé níwami ju, ayénachó máputamo ketasi risúu nírali, ayénachó máputamo tarapebi yiri namuti newaleli. Chópitamó ketasi machí mapu, bacháami Riosi yuwa, 'yémitamo arigá mapurigá jaré wabé risúu olárami niráa ju, mapurigá ne wabé tisúwati niráa ayénachó, mapurigá ke 'machíliami niráa ayénachó, mapurigá machí sapéami niráa. <sup>18</sup> Echijiti Nijeni 'yemi mi rugá ané mapu galá níima máputamo narepo echi oro anilíwami wenomí mapu wabé galabératami níli echo'ná ne wabé simírami ratáami na'írali, echi mapu Nijeni 'yemi mi 'yama mapurigátamo ne bichíwali wabé níwami níibo tamí yuwa. Ayénachó Nijeni 'yemi mi rugá ané mapu galá níima máputamo narepo echi ne wabé tosákami napacha mapu Nijeni 'yemi mi 'yama, mapurigátamo echi napachasa ketasi waminabi riwélabo mapurigá machí sapéami niráa, Ayénachó Nijeni 'yemi mi rugá jeané máputamo narepo echi busuchí owáami mapu Nijeni 'yemi mi 'yama, mapurigá echi uchésatamo ma galá ku 'machílabo. <sup>19</sup> Nijeni yóniga galá ruyé ne si'néami echi jaré mapu ikí Nijeni wabé galé, mapurigá aboni ketasi chati olama. Echijiti galá níima máputamo galá bichíuga ku ro'wibo tamí yuwa, mapurigátamo chopi olabo mapurigá Nijé nakí. <sup>20</sup> Nibira, Nijeni sinibí echo'ná machika yéachi nipawa wilí. A'lí a bilé tamí námsagá, ayénachó a irápasagá, echalí Nijeni bakimea echo'ná pachá binói bitélachi. A'lí Nijeni ko'mea binói yuwa, ayénachó binói tamí yuwa ko'mea. <sup>21</sup> Ne si'néami echi jaré pagótami mapu ikí tamí bichíúko, abóniko galá nayura. A'lí Nijeni risensia 'yama mapurigá aboni tamí yuwa muchima echo'ná Nijé níwala walubela asíbalachi, achigórigá mapurigá Nijé Binói ma galá bichíuga niyúrali, ayénachóni ma asíbali keni Onó yuwa, echo'ná Binói níwala walubela



asíbalachi. <sup>22</sup> Si'néami 'yemi máputamo námiami juko, galá namsi mapurigá echi Wabé Galabé Riosi Iwigala ané echi jaré napawika bichíyami.

**Echi Walubela Jesucristo sinibí wabé walubéraga  
anéami ju echo'ná ripá riwigachi**

**4** A'lí suwaba je'ná jerigá ma ikisá, echalí nijeni galá 'néniga riwali echo'ná ripá riwigachi biléana yéachi irápata wilíami. A'lí echi bilé wabé iwéami Ra'íchami, ne wabé anéami mapurigá bilé korneta niráa, echi mapu bachánala tamí ra'íchali, Échiko tamí jeaneli: ¡Wakiná muná! A'lí Nijeni mi 'nérama suwaba mapurigá ikimea waminánomí. <sup>2</sup> Echalí we yáati nijeni galá nulérami níili echi Wabé Galabé Riosi Iwigala jiti. A'lí bicheni riwali biléana walubela asíbalachi echo'ná ripá riwigachi nirúami. A'lí bilé Walubela asali echo'ná echi walubela asíbalachi. <sup>3</sup> A'lí echi Walubela mapu echo'ná asali, Échiko ne wabé ratábami níili mapurigá galá rataba echi bilé wabé simati wabé natéami rité, jaspe anilíwami, ayénachó mapurigá we rataba echi auché bilé kornalina anilíwami. A'lí echo'ná Binói níwala walubela asíbalachi ne nologá wilili bilé wabé simati konomí, echi mapu we ratábali mapurigá echi auché bilé wabé simati rité, wabé natéami, esmeralda anilíwami we rataba. <sup>4</sup> A'lí echo'ná mapo'ná echi bilé walubela asíbalachi chukuli, ayénachó ne nologá nirúali auché jaré osá makói miná naó o'wéala muchíbala. A'lí bicheni riwali echo'ná muchúami osá makói miná naó o'wéala ochérami ne wabé tosákami napáchami. A'lí ibili aboni oro niwárami koyétarami níili echo'ná aboni mo'ólachi. <sup>5</sup> A'lí echo'ná echi ne walubela asíbalachi jonsa ne wabé ni'wili, ayénachó ne wabé iwéami aneli, ayénachó ne wabé ri'oli. A'lí echo'ná echi walubela asíbalachi bacháami kichao rajérami nirúali. A'lí echi kichao rajérami aniwáami níili mapu echi bilepi Wabé Galabé Riosi Iwigala echo'ná asali. <sup>6</sup> Ayénachó echo'ná echi ne walubela asíbalachi bacháami nirúali mapurigá biléana wi'lé ipó, ne wabé wi'lé mapurigá echi wi'libé ba'wichí niráa, a'nagú machíami niráa mapurigá echi sipejo ventana niwalíwami. Ayénachó echo'ná walubela asíbalachi ne nologá muchili naó namuti akami, mapu wikabé buséami níili echo'ná bacháami, jubáokuá ayénachó. <sup>7</sup> A'lí echi ne bacháala akami namuti mapuyiri bilé mawiyá níili. A'lí echi auché osáala mapuyiri bilé toro níili. A'lí echi auché bisáala mapuyiri rijói cho'ola chu'wéami níili. A'lí echi auché nawosa mapuyiri bilé a'wé i'nísiami níili. <sup>8</sup> A'lí echi naó akami namuti ibili niráa usani anéwami níili. Ayénachó ibili wikabé buséami níili echo'ná bacháami, echo'ná jubáami ayénachó. A'lí echi naó akami namuti sinibí rawé, sinibí rokogó tarapé aliweli jeaniyá:

Tamujé Walubélawala, Mujemi ne wabé simírami galabé ju. Mujemi suwaba namuti ne wabé omériami ju.

Mjuemi sinibí níili chokichí jonsa, ayénachó jípimi ne Walubela ju.

A'lí waminánomí Mujemi wabé omériga ku simea echo'ná ri'lé wichimóbachi.

<sup>9</sup> A'lí echi naó akami namuti sinibí galabéraga ané echi Walubela Jesucristo mapu echo'ná echi walubela asíbalachi atí, Echi mapu sinibí niráa bité, ne sinibí. <sup>10</sup> Ayénachó echi jaré osá makói miná naó o'wéala ochérami sinibí echo'ná bacháami chokoba jaba echi Walubela Jesucristo yuwa, mapu echo'ná echi walubela asíbalachi atí. A'lí aboni sinibí niráa echirigá o'wiké echi Walubela Jesucristo mapu sinibí niráa bité, ne sinibí. A'lí si'néami aboni echo'ná bacháami Binói níwala walubela

asíbalachi waminá a'wasá echi jaré aboni níwala oro niwárami koyela, a'lí si'néami aboni sinibí jeané:

- <sup>11</sup> Tamujé Walubélawala, Mujemi tamujé Riósawala ju. Galá níima mapu Mujemi chopi waminabi walubéraga anérami níima.  
Ayénachó galá níima mapu Mujemi chopi waminabi galabé o'wikérami níima.  
Ayénachó galá níima mapu mujemi chopi ne suwaba omériami níima, mapujiti Mujemi niwáli ne suwaba namuti.  
Ayénachó Mujemi abijí oméligá olá mapurigá suwaba namuti abijí nirúlasama.  
A'lí ki'yá chokichí ne suwaba namuti niwárami níili mapujiti Mujemi nakili echirigá niwánala.

**Echi oselí osirúami mapu kicháona bawiraka 'yératami níili**

**5** A'lí nijeni riwali mapu echi Walubela echo'ná echi walubela asíbalachi atíami asali bilé oselí kabítami echo'ná Binói sikálachi watoná, echi mapu machímana osirúami níili, pachámana ayénachó. A'lí echi oselí kicháona niráa bawéraka 'yératami níili mapurigá ke wesi pagótami omérama ku ra'lana. <sup>2</sup>Echalini riwali bilé walula Riosi kapitánawala wabé jiwérami, echi mapu o'weli ra'íchaga jeanigá rukueli: ¿Chigá ne wabé omériami ju mapurigá galá omérama ku ra'lana echi oselí mapu kicháona niráa bawéraka 'yératami ju?

<sup>3</sup>A'lí ke wesi echo'ná ripá riwigachi muchúami riwílati mapu echiyena omériami níili mapurigá galá omérama ku ra'lana echi oselí, mapurigá galá 'nénama mapurigá osirúami níili. Nibilé wesi riwílati jena'í wichimóbachi muchúami echirigá omériami, nibilé wesi echi jaré ma suwíami riwílati echirigá omériami. Nibilé wesi riwílati mapu galá omériami níili 'nénia echi oselí. <sup>4</sup>A'lí nijeni wabé o'mónaga nalali mapujiti ke wesi riwílati echiyena omériami mapurigá omérama ku ra'lana echi oselí, mapurigá galá 'nenama mapurigá osirúami níili, nibilé cho mapurigá 'nema. <sup>5</sup>Echalí bilé echi jaré o'wéala ochérami tamí janeli: Ketasi waminabi nalá, mapujiti echi Walubela ma ni'yúrali. Échiko galá omero ku ra'lana echi oselí, ayénachó galá omero ku irápiya mapo'ná kicháona niráa bawéraka 'yératami níili. Echi Walubela echi jaré Jurá anilíwami Isaeli pagótami Walubélawala ju, ayénachó Binói ne wabé jiwérami ju mapurigá bilé mawiyá niráa. Échiko ayénachó echi Rabiri riwéami rijói kúchuwala kúchala ju.

<sup>6</sup>A'lí bicheni 'néniga riwali echi Walubela. A'lí Binói mapurigá bilé Méchuli niráa níili, mapu chabénala ni'lirúami níili, chopi ma ku owínami níili. A'lí Échiko echo'ná nasipa chukuli, echo'ná echi walubela asíbalachi, echo'ná nasipa echi jaré naó akami namuti yuwa, ayénachó echo'ná nasipa echi jaré osá makói miná naó o'wéala ochérami yuwa. A'lí Échiko kichao awéami níili, ayénachó kichao buséami níili. A'lí echi kichao Binói busila je'ná jerigá aniwáami ju: Mapu echi bilepi Wabé Galabé Riosi Iwigala julárami níili ne buchuwímana jena'í wichimóbachi. <sup>7</sup>A'lí echi Walubela echo'ná echi walubela asíbalachi atíami, Échiko abijí asali echi oselí echo'ná Binói sikálachi watonachi. A'lí echi auché bilé Walubela mapu Méchuli niráa níili, Échiko echo'ná nawagá chapili echi oselí mapu echi Walubela echo'ná walubela asíbalachi atíami asali echo'ná Binói sikálachi watonachi. <sup>8</sup>A'lí mapalí echi Méchuli galá chapili echi oselí,

echalí echi naó akami namuti bacháami chokoba jábali Binói yuwa, echi jaré osámakóy miná naó o'wéala ochérami ayénachó. A'lí echi jaré o'wéala ochérami ibílipi niráa kami níli echi arpa anilíwami tákowami namuti. Ayénachó ibílipi niráa kami níli kúuchi bitoli oro niwárami, ne buchíami echi moluwá. A'lí echi moluwá je'ná jerigá aniwáami ju: Echi mapu echi jaré Riosi níwala pagótami tániga ra'íchali Riosi yuwa. <sup>9</sup>Echalí ne si'néami aboni jeanigá nawajili je'ná bukulíwami nawajíwami:

Walubela, Mujemi ne wabé galabé ju, echijiti Mujemi chopi omérami ju chapiyá echi oselí, ayénachó Mujemi chopi omérami ju ku irápiya mapo'ná kicháona niráa ne wabé iwéami bawéraka 'yératami níli, mapujiti Mujemi waminá mi'lirúami níli, chópimi ma ku owínali.

A'lí bichemi tamujé tamí ku ralali mapurigata Riosi níwala pagótami níibo, mapalimi nijali Mujé Binói lalá, tamujé tamí jiti.

A'lí tamujé yuwa muchuwi jaré ibílana kanápuromí ne suníami jena'í wichimóbachi piréami, ayénachó jena'í tamujé yuwa muchuwi jaré pagótami isena ra'íchami, ne suwaba isena ra'íchali ra'íchami mapu ikí nirú ne suníami jena'í wichimóbachi, ayénachó tamujé yuwa muchuwi jaré ibílana o'wéalachi piréami mapu ikí nirú ne suníami jena'í wichimóbachi. Mujemi tamujé tamí ku ralali mapurigá si'néamita Riosi níwala pagótami níibo.

<sup>10</sup> A'lí Mujemi tamujé tamí jáwali mapurigata o'wéala niráa níibo Riosi yuwa, ayénachó mapurigata olabo Riosi nóchala, mapurigá sacerdote niráa. A'lí waminánomí tamujeta o'wéala nuláami níibo echo'ná ri'lé wichimóbachi.

<sup>11</sup> A'lí nijeni auchecho siné 'nénali mapurigá Riosi tamí 'nérali. Echalini námali ra'íchachi ne wikabé o'wéala Riosi kapitánawala ne nologá echi Walubela asíbalachi jáwami, ayénachó nologá jari echi naó akami namuti yuwa, ayénachó nologá jali echi jaré osá makói miná naó o'wéala ochérami yuwa. A'lí echi jaré Riosi kapitánawala ne wabé simírami wikabé níli mapuyénaší ke wesi omero taraya. <sup>12</sup> A'lí ne si'néami aboni o'weli ra'íchaga jeanili:

Echi Walubela mapu Méchuli niráa ju, Echi mapu chabénala mi'lirúami níli, ma ku owínami ju.

Échiko chopi wabé galabé ju, echijiti Binói chopi ne Walubela níima, ayénachó Binói chopi níwami níima suwaba namuti, ayénachó Binói chopi suwaba namuti machíami níima, ayénachó Binói chopi ne suwaba omérami níima, ayénachó Binói chopi galá o'wikérami níima, ayénachó Binói chopi ne wabé Walubela níima, ayénachó Binói chopi waminabi walubéraga anérami níima.

<sup>13</sup> Ayénachó nijeni námali ra'íchami ne si'néami pagótami, ayénachó ne si'néami echi jaré o'wéala Riosi kapitánawala, ayénachó ne suwaba namuti mapu ikí Riosi niwáli, ne suwaba mapu ikí nirú echo'ná ripá riwigachi, ayénachó ne suwaba mapu ikí nirú jena'í wichimóbachi, ayénachó ne suwaba mapu ikí nirú echo'ná wi'yérali ri'lé, ayénachó ne suwaba mapu ikí nirú echo'ná walú ba'wírali. Echirigá nijeni námali ra'íchami suwaba namuti mapu ikí nirú. A'lí je'ná jerigá anili:

Ne sinibí niráa waminabi walubéraga anérami nílaga echi Walubela mapu echo'ná echi walubela asíbalachi atí, echi Méchuli ayénachó.

Okuana ne sinibí niráa waminabi wabé o'wikérami nílaga,  
ayénachó ne wabé o'wéalatami nílaga,  
ayénachó ne sinibí niráa suwaba omériami nílaga.

<sup>14</sup>A'lí echi jaré naó akami namuti jeanili: ¡Echirigá nílaga! A'lí echi jaré osá makói miná naó o'wéala ochérami chokoba jábali echo'ná bacháami echi Walubela asíbalachi, ayénachó aboni waminabi wabé walubéraga aneli echi Walubela Riosí mapu sinibí niráa bitéami ju, ne sinibí.

### Echi oselí mapu kicháona bawilaka 'yératami níili

**6** A'lí nijeni riwali mapalí echi Méchuli irápali echo'ná biléana bachá mapo'ná echi oselí kicháona niráa ne wabé iwéami bawéraka 'yératami níili. Echalini námali bilé echi jaré naó akami namuti ne wabé o'weli ra'íchami mapurigá ri'óami niráa, echi mapu jeanili: ¡Wakiná simigá, 'neni!

<sup>2</sup>Echalí nijeni 'néniga riwali bilé kawé rosákami. A'lí echi mapu aseli echi kawé, asali bilé atá. A'lí échiko 'yárami níili bilé oro niwárami mapuyiri koyela, mapurigá bilé walubela niráa. A'lí échiko echi kawé asigá atíami, mapurigá walubela niráa simili, mapurigá waminá nikoma, ayénachó mapurigá ni'yúrama auché jaré pagótami sayéraga.

<sup>3</sup>A'lí mapalí echi Méchuli irápali echo'ná osáana mapo'ná echi oselí wabé iwéami bawéraka 'yératami níili, echalí nijeni námali echi osáala akami namuti jeaníami: ¡Wakiná simigá, 'neni!

<sup>4</sup>Echalí auché bilé kawé machínali, echi mapu sitákami níili. A'lí echi mapu aseli echi kawé 'yárami níili mapurigá wabé omériga olama, mapurigá ke wesi jena'í wichimóbachi piréami waminabi kilí ologá pirélama, chopi mapurigá aboni a'nagupi nakówaga ko'wimea. Ayénachó échiko 'yárami níili bilé wi'libé ripiyá.

<sup>5</sup>A'lí mapalí echi Méchuli irápali echo'ná bisáala mapo'ná echi oselí wabé iwéami bawéraka 'yératami níili, echalí nijeni námali echi bisáala akami namuti jeaníami: ¡Wakiná simigá, 'neni! A'lí nijeni 'néniga riwali bilé kawé chókami. A'lí echi mapu aseli echi kawé, échiko chapigá asali bilé namuti anáalawami echo'ná binói sikálachi.

<sup>6</sup>A'lí nijeni námali bilé ra'íchami echo'ná nasipa echi jaré naó akami namuti yuwa atíami, echi mapu jeanili: Bilé kilo turío bilé rawé nóchaga natétawami ju. A'lí bikiyá kilo sebara anilíwami rakala ayénachó bilé rawé nóchaga natétawami ju. Chopi ketasi suwábasi echi aceite olivo anilíwami niwárami, nibilé cho suwábasi echi uva anilíwami rakéami namuti ba'wila.

<sup>7</sup>A'lí mapalí echi Méchuli irápali echo'ná naóana mapo'ná echi oselí wabé jiwériga bawéraka 'yératami níili, echalini námali echi nawosa akami namuti jeaníami: ¡Wakiná simigá, 'neni!

<sup>8</sup>Echalí nijeni 'néniga riwali bilé kawé bawami. A'lí echi mapu aseli echi kawé, Mukuwáwami riwéami níili. A'lí jubá okuá bilé cho inárali mapu walula ju echo'ná mapo'ná echi jaré suwíami aliwala muchuwi. A'lí echi mapu Mukuwáwami riwéami níili, échiko 'yárami níili mapurigá walubela nuláami níima echo'ná biléana mapo'ná naóana rojonárami ju ne sunfami mapusí atí je'ná kawí. A'lí échiko wabé omériga olama mapurigá wikabé pagótami a'nagupi nakówaga suwimea, ayénachó mapurigá auché jaré wikabé wabé 'locheka suwimea, ayénachó mapurigá auché jaré wikabé ko'wirúami níima jena'í wichimóbachi nirúami jobátami namuti jiti.

<sup>9</sup>A'lí mapalí echi Méchuli irápali echo'ná malíana mapo'ná echi oselí wabé jiwériga bawéraka 'yératami níli, echalí echo'ná ri'lé pachá, mapo'ná echi jaré namuti ko'wagá, ikósaga, 'yálati Riosi, echo'ná nijeni riwali si'néami echi jaré pagótami aliwala mapu ikí chabénala ko'wirúami níli mapujiti aboni galá bichíli Riosi Ra'íchala, ayénachó mapujiti aboni echirigá nawésali echi auché jaré pagótami. <sup>10</sup>Echalí si'néami aboni o'wéli ra'íchaga jeanili: Tamujé Walubélawala, Mujemi wabé galabé ju, ayénachómi sinibí olá achigórigá mapurigami bichíwaga aní mápumi olama. ¿Chu kilíbukomi galá wi'nijiga kastigo 'yama echi jaré pagótami echo'ná ri'lé wichimóbachi piréami mapu tamujé tamí ko'yali?

<sup>11</sup>A'lí si'néami aboni 'yálati napachala wabé tosákami, ayénachó aboni anélati mapu abijí pe téeli buwema mapuyénaší echi auché jaré aboni ritémawala mapu achigórigá bichíyami ju Jesucristo niráa, ayénachó waminá ko'wirúami níma, si'néami mapu ikí echirigá ko'wirúami nímakó mapujiti aboni achigórigá bichíi Jesucristo niráa.

<sup>12</sup>A'lí mapalí echi Méchuli irápali echo'ná usáana mapo'ná echi oselí ne wabé jiwériga bawéraka 'yératami níli, echalini riwali mapu ne wabé nokuali kawí, a'lí echi rayénali waminá chónali mapurigá bilé chiní chókami niráa. A'lí echi michá waminá suwaba sitánali mapurigá la niráa, <sup>13</sup>ayénachó echi sopolí waminá ri'lé wi'yérali rujuili mapurigá echi chuná ke cho wáami waminá rujuní mapalí ne wabé iwéami iká. <sup>14</sup>Echalí echo'ná ripá riwigachi ma ketasi siyónami níli. Suwaba ke ne ikili mapurigá bilé oselí ke ne ikí mapalí táa niráa kabítami ju. A'lí suníami ripá chulítami si'wina muchuwárami níli, ayénachó ne suníami echo'ná nasipa walubé ba'wírali nirúami kawí waminá si'wina muchuwárami níli. <sup>15</sup>Echalí ne si'néami echi jaré o'wéala silíami jena'í wichimóbachi nuláami echo'ná risochíami ichípsali, echo'ná ritérali ayénachó. A'lí ne si'néami echi auché jaré o'wéala ayénachó echirigá ichípsali, ne si'néami echi jaré wabé níwami ayénachó, echi jaré o'wéala wikabé sontarsi nuléami ayénachó, echi jaré wabé jiwérami asíchiko. A'lí ne si'néami echi jaré pióntami ayénachó echirigá ichípsali, ne si'néami echi auché jaré pagótami mapu ikí ketasi pióntami níli asíchiko. <sup>16</sup>A'lí ne si'néami aboni o'wéli ra'íchaga jeanili echi jaré chulítami, echi jaré o'wéli rité ayénachó: ¡Tamujé tamí tibati! ¡Tamujé tamí ichípati, mapurigá echi Walubela Riosi, echo'ná walubela asíbalachi atíami ketasi tamujé tamí riwimea, ayénachó mapurigá echi Méchuli ketasi tamujé tamí risúu ologá walubé kastigo 'yama!

<sup>17</sup>¡Ma seba ne jubá rawé! Jipi echi Walubela Riosi ma tamujé tamí walú kastigo 'yama. A'lí ke wesi omérama ku kuwana sayera echi Walubela Riosi.

### Jaré Isaeli pagótami bawirárami níli

**7** Pe wilibeko, je'ná jerigá ma ikisá nijeni ayénachó riwali naó o'wéala Riosi kapitánawala, echo'ná a'nagú naóna jáwami jena'í wichimóbachi, echi mapu iweli echi iká, mapurigá ma ketasi waminabi ikamea nibilé pe biléana jena'í wichimóbachi, nibilé cho pe biléana echo'ná moba echi walubé ba'wírali, nibilé cho pe biléana echo'ná jaréana okórali. <sup>2</sup>Ayénachóni riwali auché bilé walula Riosi kapitánawala echo'ná panina machínami, mapokuá machina echi rayénali. A'lí échiko echi mapuyiri bawiráwami kami níli, echi Sinibí Bitéami Riosi níwala. Echalí echi bilé walula Riosi kapitánawala o'wéli ra'íchali echi auché jaré naó Riosi kapitánawala mapu 'yárami níli mapurigá aboni wabé omérama sitíi niwayá je'ná

kawí, ayénachó mapurigá aboni omérama sitíi niwayá echi walú ba'wírali. Echali echi bilé walula Riosi kapitánawala jeaneli:

<sup>3</sup>Ketasi cho sitíi niwási je'ná kawí, nibilé cho sitíi niwási echi walubé ba'wí, nibilé cho suwábasi echi jaré okó, mapuyénasí tamujeta ketasi cho bawirá echi jaré Riosi níwala pagótami echo'ná aboni kowálachi.

<sup>4</sup>A'lí nijeni námali aníachi mapu chu kipu nílo mapu echirigá bawirárami níli: Bilé kiento nawosa makói waminá naó mili níli. A'lí ne si'néami aboni echi jaré Isaeli pagótami níli, echi mapu makói miná okuáana rojuákami ju. A'lí echo'ná ibílana rojuákamichi, makói miná okuá mili níli mapu echirigá bawirárami níli. <sup>5</sup>Echalí makói miná okuá mili bawirárami níli echi Jurá riwéami rijói kúchala kúchuwala. Ayénachó makói miná okuá mili bawirárami níli echi Reubeni riwéami rijói kúchala kúchuwala. Ayénachó makói miná okuá mili bawirárami níli echi Gari riwéami rijói kúchala kúchuwala. <sup>6</sup>Ayénachó makói miná okuá mili bawirárami níli echi Aseri riwéami rijói kúchala kúchuwala. Ayénachó makói miná okuá mili bawirárami níli echi Netalí riwéami rijói kúchala kúchuwala. Ayénachó makói miná okuá mili bawirárami níli echi Manasesi riwéami rijói kúchala kúchuwala. <sup>7</sup>Ayénachó makói miná okuá mili bawirárami níli echi Simeoni riwéami rijói kúchala kúchuwala. Ayénachó makói miná okuá mili bawirárami níli echi Lebí riwéami rijói kúchala kúchuwala. Ayénachó makói miná okuá mili bawirárami níli echi Isakari riwéami rijói kúchala kúchuwala. <sup>8</sup>Ayénachó makói miná okuá mili bawirárami níli echi Sabuloni riwéami rijói kúchala kúchuwala. A'lí makói miná okuá mili bawirárami níli echi José riwéami rijói kúchala kúchuwala. Ayénachó makói miná okuá mili bawirárami níli echi Benjamini riwéami rijói kúchala kúchuwala.

#### Ne wikabé pagótami tosákami napáchami

<sup>9</sup>Pe wilibeko je'ná jerigá ma ikisá, nijeni riwali auché jaré ne wabé wikabé pagótami. Ne wabé wikabé níli, mapuyénasí ke wesi omérali taraya. A'lí aboni ibílana jena'í wichimóbachí jonsa síami níli. Ayénachó echo'ná muchili jaré ibili isena pagótami ne suníami jena'í wichimóbachí piréami, jaré ibili isena ra'íchami pagótami ayénachó. A'lí echi wikabé pagótami jali echo'ná bacháami echi Walubela Riosi asíbalachi, ayénachó echo'ná bacháami mapo'ná echi Méchuli asali. A'lí ne si'néami aboni tosákami napáchami níli, ayénachó ibili echi rakú sawala chapigá jali. <sup>10</sup>Echalí ne si'néami aboni o'wéli ra'íchaga jeanili:

Tamujé Riósawala mapu echo'ná walubela asíbalachi atí,

Echi ju mapu tamujé tamí ku 'yeli suwaba máputa chati olali.

Echi Méchuli ayénachó ju mapu tamujé tamí echirigá ku 'yeli suwaba máputa chati olali.

<sup>11</sup>Echalí ne si'néami echi jaré o'wéala Riosi kapitánawala nologá jali echo'ná echi Walubela asíbalachi, ayénachó aboni nologá jali echi jaré o'wéala ochérami yuwa, ayénachó echi jaré naó akami namuti yuwa. A'lí ne si'néami echi jaré wikabé Riosi kapitánawala chokoba jaga akaná uchúpaga waminabi wabé walubéraga aneli Riosi, jeanigá:

<sup>12</sup>¡Echirigá nílagá! Galá níma mapu tamujé Riósawala ne sinibí niráa galabéraga anérami nísa,



ayénachó mapu Binói waminabi walubéraga anérami níisa.  
 Echi Walubela tamujé Riósawala ne suwaba namuti machíami ju.  
 Galá níima mapu si'néami pagótami walú natétara 'yasa Riosi.  
 Échiko chopi wabé Walubela ju, ayénachó Binói suwaba omériami ju.  
 Galá níima mapu Binói echirigá wabé walubéraga anérami níisa ne sinibí  
 niráa, ne sinibí. ¡Echirigá níima!

<sup>13</sup>Echalí bilé echi jaré o'wéala ochérami tamí rukueli jeanigá: ¿Chigá ju echi ne wabé wikabé pagótami mapu ne wabé tosákami napáchami ju? ¿Kumi okuá jonsa sili?

<sup>14</sup>A'lí nijeni jeaneli: Keni walúlawa, mujemi chopi machí chigá ju. Echali binói tamí jeaneli: Si'néami je'ná galá bichíyami pagótami ne wabé simírami risúu olárami níili echo'ná wichimóbachi bukulí ne jubá rawé. Aboni ma galá bi'wíami niwálati, mapujiti aboni chati olalila ku 'yérami níili, mapujiti Jesucristo wabé léntiga mi'lirúami níili aboni chati olalila jiti, mapurigá echi Riosi níwala Méchuli niráa. <sup>15</sup>Echijiti aboni bacháami ja echo'ná echi walubela asíbalachi mapo'ná Riosi atí. A'lí aboni echo'ná pachá Riosi ri'obáwalachi jaga waminabi walubéraga ané Riosi, sinibí rawé, sinibí rokogó ayénachó. A'lí Riosi mapu echo'ná echi walubela asíbalachi atí, Échiko sinibí galá tibútama aboni, mapujiti Binói ne sinibí aboni yuwa asimea. <sup>16</sup>A'lí aboni ma ketasi 'lochema, nibilé balámama. A'lí echi rayénali ma ketasi ne wabé simírami ratáami rayenama echo'ná abónichi, ayénachó aboni ketasi waminabi we ratálama, <sup>17</sup>mapujiti echi Méchuli mapu echo'ná nasipa echi walubela asíbalachi atí, Échiko galá tibuka nisérama aboni, mapurigá bo'wá niráa. A'lí echi Méchuli métama aboni mapo'ná walubé machina echi ba'wí mapu 'ya mapu aboni sinibí niráa pirélama. A'lí Riosi galá ku kanílatama aboni, mapurigá ma ketasi o'móniga nalákama.

### Mapo'ná kicháona niráa bawirárami níili echi oselí

**8** A'lí mapalí echi Méchuli irápali echo'ná kicháona mapo'ná echi oselí ne wabé jiwériga bawirárami níili, echali echo'ná ripá riwigachi pe téelipi ke anigá wilíbbali mapuyénasi nasipa “Hora” niráa. <sup>2</sup>Echalí we yáati nijeni riwali echi jaré kichao o'wéala Riosi kapitánawala mapu echo'ná bacháami jali mapo'ná Riosi Binói asali. A'lí aboni ibílipi niráa 'yálati echi tákawami namuti, korneta anilíwami. <sup>3</sup>Echalí auché bilé Riosi kapitánawala echo'ná nawagá bacháami wilíbbali echo'ná jubétachi mapo'ná ikósalati echi moluwá. A'lí echi bilé Riosi kapitánawala chapigá nawali bilé jarito oro niwálamu sawili rajáami muchúwami. Échiko ikósanala 'yálati walú moluwá mapurigá echo'ná ri'lé pe uchíi jubétachi oro niwárami ikósama, echo'ná bacháami echi walubela asíbalachi, mapurigá echi moluwá molila munama mapo'ná Riosi atí, achigórigá mapurigá echi jaré bichíyami pagótami ra'íchala moyénali, mapalí aboni ra'íchali Riosi yuwa. <sup>4</sup>Echalí echi moluwá molila moyénali echo'ná ripá mapo'ná Riosi atí, achigórigá mapurigá echi jaré bichíyami pagótami ra'íchala ayénachó muyénali, suwaba mapu ikí echi jaré bichíyami pagótami tániga ra'íchali Riosi yuwa. <sup>5</sup>A'lí echi bilé Riosi kapitánawala chapili echi jarito oro niwárami, a'lí galá buchíwali echi sawili rajáami, echo'ná echi pe uchíi jubétachi nirúami. Echali echi Riosi kapitánawala suwaba waminá a'wali buchuwímana jena'í wichimóbachi. A'lí we yáati wisabé ri'oli, ayénachó wabé chaneli, ayénachó wisabé ni'wili, ayénachó ne wabé nokuali kawí.

**Echi kichao korneta anilíwami tákowami namuti**

<sup>6</sup>A'lí echi kichao o'wéala Riosi kapitánawala mapu chapigá jali echi kichao korneta anilíwami tákowami namuti, abóniko ma kariweli taya.

<sup>7</sup>A'lí echi bacháwala Riosi kapitánawala tali binói níwala korneta. Echali rijé rujuili jena'í wichimóbachi, ayénachó rujuili na'í, la nasówami. A'lí echi na'í jiti ne noguí nasipa jena'í wichimóbachi ikótali. Echali ne noguí nasipa ikótali echi okó, ayénachó ne noguí nasipa ikótali echi kasalá siyónami.

<sup>8</sup>A'lí echi osáala Riosi kapitánawala tali binói níwala korneta. Echali mapuyiri bilé walubé kawí chulítami, we rajáami, pátami níli echo'ná walú ba'wírali. A'lí ne noguí nasipa echi walú ba'wí la najítali. <sup>9</sup>Ayénachó ne noguí nasipa echi jaré akami namuti echo'ná walú ba'wírali 'yéami waminá suwili. A'lí ne noguí nasipa echi jaré kalí ba'wechi moba 'yéami, barko anilíwami, suwaba suwábarami níli.

<sup>10</sup>A'lí echi baisala Riosi kapitánawala tali binói níwala korneta. Echali bilé walubé sopolí wichili echo'ná ripá riwigachi jonsa. Échiko ne wabé simírami rajáami níli, mapurigá bilé walú namuti rajérami. Echali echi sopolí rajáami echo'ná moba wichíwali jena'í wichimóbachi nirúami bakochi, ne noguí nasipa, ayénachó echo'ná ne noguí nasipa mapomí ba'wí machína. <sup>11</sup>A'lí echi walubé sopolí rajáami Chipúami anilíwami níli. Echali ne noguí nasipa echi ba'wí waminá chipúami najítali. A'lí ne wikabé pagótami waminá suwili, echi ba'wí jiti, mapujiti ne wabé simírami chipúami níli.

<sup>12</sup>A'lí echi nawosa Riosi kapitánawala tali binói níwala korneta. Echali echi rayénali ne noguí nasipa chi'wanárami níli, ayénachó echi michá ne noguí nasipa, ayénachó echi jaré sopolí ne noguí nasipa, mapurigá ne noguí nasipa chonama. Echijiti isina rawé ne noguí nasipa ketasi rayénali, ayénachó isina rokogó ne noguí nasipa ketasi ratábali echi michá, echi jaré sopolí ketasi cho.

<sup>13</sup>A'lí nijeni auchecho siné 'nénali. Echalini námali bilé Riosi kapitánawala echo'ná ne wabé ripana i'nika inárami, echi mapu o'wéli ra'íchaga jeanili: ¡Mbaji! ¡Echi pagótami echo'ná wichimóbachi piréami ne wabé simírami risúu olárami níma mapalí echi auché bikiyá Riosi kapitánawala isínipi niráa tama aboni níwala korneta!

**9** A'lí echi malisa Riosi kapitánawala tali binói níwala korneta. Echali nijeni riwali bilé sopolí mapurigá ripá riwigachi jonsa wichíami niráa. A'lí échiko 'yárami níli echi irápara mapurigá irápama echo'ná wabé ri'libé jochi mapo'ná ketasi suwíbami ju ri'léna, mapo'ná echi walubé na'í we rajá. <sup>2</sup>A'lí échiko irápali echo'ná wabé ri'libé jochi. Echali echo'ná jochi jonsa ne wabé ripabé moyénali walubé molí, mapurigá wabé molina biléana ne walubé na'írali. Echali ne wabé mololi jena'í wichimóbachi, echijiti we na'oli echi rayénali. <sup>3</sup>A'lí echo'ná molírali jonsa 'machínsa ne wikabé mapuyiri korochi, ne buchuwímana i'nika 'yéali jena'í wichimóbachi. A'lí echi wikabé mapuyiri korochi 'yárami níli mapurigá wabé omériga ikima echi pagótami, achigórigá mapurigá níki echi jaré machili, jena'í wichimóbachi nirúami. <sup>4</sup>A'lí echi wikabé mapuyiri korochi nulérami níli mapurigá aboni ketasi suwábama echi kasalá siyónami, nibilé mapurigá suwábama echi auché jaré a'wíami namuti, nibilé mapurigá aboni suwábama echi okó, chopi aboni nulérami níli mapurigá ne wabé chati risúu olama echi jaré pagótami, si'néami mapu iki ketasi bawirárami níli echo'ná aboni kowálachi mapurigá Riosi níwala pagótami niráa. <sup>5</sup>A'lí echi wikabé mapuyiri korochi ketasi 'yárami níli mapurigá

aboni ko'wimea echi jaré pagótami, chopi 'yárami níli mapurigá ne wabé okótama echi jaré pagótami malí michá yénasí. Echali aboni ne wabé simírami okótali echi pagótami, mapurigá okó mapalí echi machili tamujé tamí ikí. <sup>6</sup>Echalí rawé jena'í wichimóbachi piréami pagótami we ama mapu churigá aboni omérama we yáa suwiyá, chopi aboni ketasi riwimea mapu churigá suwimea. Echali aboni wabé nakímea suwinala, chopi aboni ketasi omérama suwiyá.

<sup>7</sup>A'lí echi wikabé korochi mapuyiri kawé níli, ma kariwérami mapurigá echi jaré sontarsi asema ma nakóbiya simiba auché jaré sayérsiya. A'lí echo'ná echi korochi mo'ólachi koyératami níli mapuyiri koyela oro niwárami, ayénachó aboni mapuyiri rijói niráa chuwéwami níli. <sup>8</sup>A'lí aboni wabé i'weli kupéami níli, mapurigá muguí niráa; ayénachó aboni ramilá mapuyiri mawiyá ramilá níli. <sup>9</sup>A'lí aboni mapuyiri jiero napáchami níli. A'lí aboni analá wabé chaneli mapalí i'nika 'yénali, achigórigá mapurigá we chané wikabé troka anilfwami mapu kawé jiti banírawami ju, mapalí echi wikabé sontarsi nakónalaga simiba. <sup>10</sup>A'lí echi jaré wikabé mapuyiri korochi mapuyiri machili waséami níli, ayénachó aboni wabé níkíami níli mapurigá echi jaré machili. Echijiti aboni wabé omériami níli risúu olayá echi pagótami malí michá yénasí. <sup>11</sup>A'lí echi wikabé mapuyiri korochi níwali aboni walula kapitánawala, echi mapu walula silíami ju echo'ná wabé ri'libé jochi mapo'ná ketasi suwíbami ju ri'léna. Échiko Abaroni riwéami ju, echi Ebreo anilfwami pagótami ra'íchala niráa, ayénachó Apolioni riwéami ju echi auché jaré Griego anilfwami pagótami ra'íchala niráa, echi mapu je'ná jerigá aniwáami ju: Echi suwábiami.

<sup>12</sup>Jena'í wichimóbachi piréami pagótami ma bachá niráa ne wabé simírami risúu olárami níli; chopi aboni abijí auché osá niráa echirigá ne wabé simírami risúu olárami níma.

<sup>13</sup>A'lí echi usansa Riosi kapitánawala tali binói níwala korneta. Echali nijeni námali bilé ra'íchami mapu echo'ná bacháami Riosi yuwa asali, echo'ná nasipa mapo'ná echi naó awá jali, echi mapu echo'ná echi uchíi oro niwárami jubechi jawárami níli. <sup>14</sup>Echalí echi ra'íchami aneli echi usansa Riosi kapitánawala, echi mapu chapigá wilili binói níwala korneta, jeanigá: Ku botoná echi naó o'wéala riablo kapitánawala mapu buliruka muchuwi echo'ná mulubé walú bakochi Eujarátachi anilfwachi.

<sup>15</sup>Echirigá ma ku botonálati echi naó riablo kapitánawala mapu ma a'láraga muchuwárami níli mapurigá aboni waminá ko'wimea ne noguí nasipa echi jaré pagótami jena'í wichimóbachi piréami, mapalí ma seba tétali mapalí Riosi nakí mapu echirigá olárami níma. <sup>16</sup>Echalí nijeni námali mapu chu kipu ne wabé wikabé sontarsi 'yénali echi naó riablo kapitánawala yuwa, ayénachó si'néami aboni kawé aséami níli. Ne wabé wikabé, okuá kiento miyoni níli.

<sup>17</sup>Echalí nijeni echirigá riwali echi wikabé kawé mapalí Riosi echirigá tamí riwírali. Ibili niráa asérami níli. A'lí echi wikabé aséami jiero napáchami níli, a'lí aboni jiero napáchala sitákami níli, siyónami ayénachó, sarówami ayénachó. A'lí echi wikabé kawé mapuyiri mawiyá mo'wéami níli, ayénachó echo'ná aboni cho'olachi jonsa machínali na'í, molí yuwa, echi wabé simírami chati asújiri anilfwami molila ayénachó. <sup>18</sup>Echalí ne noguí nasipa echi jaré pagótami jena'í wichimóbachi piréami waminá suwili echi na'í jiti, ayénachó echi molí jiti, ayénachó echi asújiri molila jiti, mapu echo'ná echi wikabé kawé cho'olachi jonsa machínali. <sup>19</sup>Mapujiti echi

wikabé kawé wabé jiwérami níli echo'ná aboni cho'olachi, ayénachó aboni wabé jiwérami níli echo'ná aboni wasílachi, mapujiti aboni wasila mapuyiri sayawi níli, ayénachó aboni wasila mapuyiri sayawi mo'ola mo'wéami níli. A'lí aboni wabé uchuli echi jaré pagótami aboni wasila jiti.

<sup>20</sup>A'lí echi auché jaré pagótami mapu ketasi suwili mapalí echi wikabé kawé echirigá risúu olali echi pagótami, abóniko arigá ketasi wikáwali tánali Riosi, chopi aboni waminabi wabé chati chuwé olali, ayénachó aboni waminabi wabé o'wikeli echi jaré riablo kapitánawala, ayénachó aboni waminabi chokoba jaga o'wikeli echi jaré amachíkalawami namuti oro niwárami, echi jaré plata anilfwami niwárami ayénachó, echi jaré bronke anilfwami niwárami ayénachó, echi jaré rité niwárami ayénachó, echi jaré kusí niwárami asíchiko. A'lí echi jaré amachíkalawami namuti ketasi omero 'nena, nibilé cho omero nama, nibilé cho omero simiba. <sup>21</sup>A'lí echi pagótami wabé ko'yáami níli auché jaré, ayénachó aboni we sipabúami níli, ayénachó aboni chuwé bilétari yuwa kochíami níli, ayénachó aboni wabé chigórami níli, chopi aboni arigá ketasi wikáwali tánali Riosi, nibilé cho ariweli echirigá chati olayá.

#### Echi Riosi kapitánawala bilé oselí kami

**10** Echali nijeni riwali auché bilé walula Riosi kapitánawala ripá riwigachi jonsa rikínami. Échiko echo'ná nasipa nolfrali inárali, ayénachó bilé konomí nologá wilili echo'ná binói mo'ólachi, ayénachó binói cho'olá wabé ratábari mapurigá echi rayénali, ayénachó binói ronola wabé ratábali mapurigá na'í rajáami. <sup>2</sup>Echi walula Riosi kapitánawala chapigá nawali bilé taa oselí ra'lanárami echo'ná binói sikálachi. Echali échiko binói ronola watonachi echo'ná moba walubé ba'wírali teka wilili, ayénachó binói ronola o'winachi echo'ná wi'yérali teka wilili. <sup>3</sup>A'lí échiko o'weli sinali mapurigá bilé mawiyá o'weli kusú. A'lí mapalí echi sinali, echali we yáati ne kicháosa ri'oli, chopi nijeni námali mapurigá jaré kichao o'weli ra'íchami niráa. <sup>4</sup>A'lí mapalí nijeni echirigá kicháosa o'weli ra'ícharami níli, echalini osimea olali mapurigani námali. Chopi we yáati nijeni námali auché bilé Ra'íchami, echo'ná ripá riwigachi ra'íchami, mapu tamí jeaneli: Ketasi osá mapurigami echi kichao jiti ra'ícharami níli, mapalí ne kicháosa ri'oli, chopi ke wesi ku ruyé mapurigami námali.

<sup>5</sup>Echali echi walula Riosi kapitánawala mapu nijeni bachánala riwali binói ronola watonachi teka wilíami echo'ná moba walubé ba'wírali, ayénachó binói ronola o'winachi teka wilíami echo'ná moba wi'yérali, échiko ri'iná wilali watoná binói sikala. <sup>6</sup>A'lí jeanili: Achigórigá mapurigá Riosi sinibí ne bichíwali aní, nijeni ayénachó 'yemi mi ne bichíwali ané mapu ma seba tétali mapalí Riosi ne bichíwali sunima olayá ne suwaba mapu ikí Binói nakí olánala, achigórigá mapurigá chabé ki'yá Binói júuli ruyénala jena'í wichimóbachi piréami pagótami mapu Binói ne bichíwali olama, ma sébachi jipi rawé. A'lí Riosi mapu echirigá júuli Binói piónawala ruyénala echi pagótami, echi Riosi ju mapu sinibí niráa bité, ne sinibí, ayénachó Binói níli mapu niwáli echo'ná ripá riwigachi, suwaba je'ná kawí ayénachó, echi walubé ba'wí ayénachó, ne suwaba namuti mapu ikí nirú ne buchuwímana ayénachó. <sup>7</sup>Echali echi bacháwala walula Riosi kapitánawala ayénachó bichíwaga anili mapu ke 'me ayó mapalí ma o'winama taa echi kicháona korneta táami walula Riosi kapitánawala, echali Riosi ma sunima olayá suwaba mapu ikí Binói nakili olánala

ki'yá jonsa. A'lí ketasi cho machirúami níli mapurigá Riosi nakili olánala, chopi Riosi arigá echirigá ruyeli echi jaré ki'yánala piréami nawésami mapu ayénachó Riosi piónawala niráa níli.

<sup>8</sup>Echalí echi ra'íchami mapu bachánala tamí ra'íchali ripá riwigachi jonsa, échiko auchecho siné tamí ra'íchali jeanigá: Simigá chapí echi taa oselí ra'lanárami mapu echi bilé Riosi kapitánawala chapigá wilí, echi mapu binói ronola watonachi echo'ná moba walubé ba'wírali teka wilí, ayénachó binói ronola o'winachi echo'ná wi'yérali teka wilí.

<sup>9</sup>Echalini simili echo'ná mapo'ná echi walula Riosi kapitánawala wilili. A'lí bicheni aneli mapu tamí 'yama echi taa oselí. Echali échiko tamí jeaneli: ¡Chapigá ko'wa! Mujemi ne galá akárama mapurigá echi kolimena niráa, chopi mapalimi ma kosá echali mujé ropálachi wabé chipúami nílama.

<sup>10</sup>Echalini chapili echi oselí mapu echi walula Riosi kapitánawala chapigá wilili, a'lí bicheni galá ko'wali. We galá akáami níli mapurigá kolimena niráa mapalini echirigá ko'wali, chopi mapalini ma kosá, echali nijé ropálachi ne wabé chipúami nílasali. <sup>11</sup>Ayénachó tamí jeaneli: Abijí 'wérali ju mapu mujemi Riosi jiti nawisama wikabé isena pagótami jiti rugá, kanápuromí piréami, echi jaré mapu wikabé isena ra'íchami ju. Ayénachómi abijí nawisama wikabé o'wéala silfami jiti rugá.

#### Echi okuá rijói mapu Riosi júuli nawisánala

**11** Echali nijeni 'yálati bilé baká tétalawami, ayénachóni jeanelati: Simigá, teti echi walubé Riosi ri'obáwala, ayénachó teti echi jubechi mapo'ná echi jaré namuti ko'yagá 'yárami ju Riosi, ayénachó tará echi pagótami mapu echo'ná pachá Riosi ri'obáwalachi jaga walubéraga ané Riosi. <sup>2</sup>Chopi ketasi teti echo'ná ri'obachi machímana ri'narátachi, mapujiti echo'ná ma 'yárami níli echi auché jaré isena pagótami. A'lí aboni echo'ná galabé walúlachi 'yénga, mapurigá o'wéala niráa nulama nawosa makói miná okuá michá. <sup>3</sup>Echalí Nijeni nawisánala julama echi okuá rijói Nijé jiti nawésami. A'lí aboni nawisama bilé mili, miná okuá kiento, miná usánasa makói rawé iyénaší. A'lí aboni ochókami napáchaga 'yéngama mapurigá wabé o'mónami niráa, mapurigá echi auché jaré pagótami machímea mapu si'néami aboni chati oláami ju, ayénachó mapurigá aboni nakimea ku ro'wínala Riosi yuwa.

<sup>4</sup>Je'ná okuá nawésami rijói mapuyiri okuá olivo anilfwami rakéami namuti ju, ayénachó mapuyiri okuá rajilí jawálawami namuti ju, mapu echo'ná bacháami Riosi yuwa jawí, echi mapu Walubela Nuláami ju jena'í wichimóbachi. <sup>5</sup>A'lí a jaré pagótami chibi olánalasagá echi okuá rijói Riosi jiti nawésami, echali echo'ná aboni chumurachi jonsa machínama na'í mapu suwaba suwábama aboni asayela, mapujiti echi na'í jiti suwimea mapuyíripi mapu ikí chibi olánalako echi okuá rijói Riosi jiti nawésami. <sup>6</sup>Je'ná okuá rijói Riosi jiti nawésami 'yárami níma mapurigá aboni omérama olayá mapurigá ketasi ukumea jena'í wichimóbachi mapuyénaší aboni echirigá nawesa 'yena, ayénachó mapurigá aboni omérama la niwayá echi ba'wí, ayénachó mapurigá aboni omérama karúmati jiti wabé risúu olayá echi pagótami jena'í wichimóbachi piréami, ne sinibí mapalí aboni nakí. <sup>7</sup>Chopi mapalí echi okuá nawésami rijói ma sébali sunima nawésiya, echali echi walula silfami echo'ná ri'libé jochi jonsa machínamí, mapo'ná ketasi suwíbami ju ri'léna, échiko wabé nikoma echi okuá nawésami rijói sayéraga, ayénachó binói wabé omérega waminá ko'wimea aboni. <sup>8</sup>A'lí echi okuá suwíami echo'ná nasipa echi walubé

walúlachi ri'narátachi bitimea, echo'ná walúlachi mapo'ná tamujé Walubélawala Jesucristo echo'ná kúrsichi michóniga mi'lílati. Echo'ná ayénachó Sorómachi anilíwa mapujiti echo'ná piréami achigórigá chati oláami ju mapurigá echo'ná Sorómachi piréami chati oláami níli; ayénachó Ejíptochi anilíwa mapujiti echo'ná piréami pagótami ke bichíyami ju, achigórigá mapurigá echo'ná Ejíptochi piréami pagótami ke bichíyami níli. <sup>9</sup>A'lí echo'ná piréami pagótami riwimea echo'ná bitíami echi okuá suwíami bikiyá rawé miná nasipa iyénasí. Echálí wikabé isena pagótami buchuwímana jena'í wichimóbachi piréami riwimea echi okuá suwíami echirigá bitíami, ayénachó jaré ibili isena ra'íchami pagótami riwimea, ayénachó jaré ibílana o'wéalachi piréami pagótami ne buchuwímana jena'í wichimóbachi echirigá riwimea. A'lí echi jaré pagótami ketasi risensia 'yama mapurigá echi okuá suwíami waminá tótami níima. <sup>10</sup>Echalí jena'í wichimóbachi piréami pagótami wabé kanílama mapujiti echi okuá rijói Riosi jiti nawésami ma ko'wílati, ayénachó aboni a'nagupi karúmati kónama, mapujiti echi okuá rijói Riosi jiti nawésami wabé risúu olali aboni, chopi okuánika ma ko'wirúami níli. <sup>11</sup>Chopi ma simírasa bikiyá rawé miná nasipa, echálí Riosi auchecho ku iwítali aboni. A'lí biché aboni ku o'winsa jábali. Echálí ne wabé majajali ne si'néami echi jaré pagótami mapu ikí riwálíko. <sup>12</sup>Echalí echi okuá rijói Riosi jiti nawésami námali bilé o'wali Ra'íchami, mapu ripá riwigachi jonsa jeanigá ra'íchali: Wakiná ri'iná munasi.

A'lí aboni echo'ná ripá riwigachi muyénali biléana nolírali nasipa. A'lí echi wikabé aboni sayera galá riwali aboni echirigá ku simíbami. <sup>13</sup>Echalí we yáati ne wabé nokuali kawí. A'lí echo'ná walúlachi bilepi kalí najuli ibílana mapo'ná makói nirúali. Echirigá ne wabé wikabé kalí najuli, ayénachó wikabé, mapuyénasí kichao mili pagótami echijiti waminá mitáchaga suwili. Echálí echi auché jaré pagótami ne wabé majajaratami níli, echijiti aboni walubéraga aneli Riosi, ripá riwigachi atíami.

<sup>14</sup>Jena'í wichimóbachi piréami pagótami ma osá chokéami wabé simírami chati risúu olárami níli, chopi ke 'me ayó aboni abijí auchecho siné baisáala echirigá ne wabé simírami risúu olárami níima.

#### **Echi kicháosa korneta**

<sup>15</sup>A'lí echi kicháosa walula Riosi kapitánawala tali binói níwala korneta. Echálí jaré o'wali ra'íchami echo'ná ripá riwigachi muchúami je'ná jerigá ra'íchachi námami níli:

Tamujé Riósawala ma ne Walubela niráa nulama echo'ná wichimóbachi ne suníami o'wéalachi,

Binói Ranala Jesucristo yuwa.

A'lí biché Binói ne Walubela níima ne sinibí niráa.

<sup>16</sup>A'lí echi jaré osá makói miná naó o'wéala ochérami echo'ná bacháami Riosi yuwa muchili, echo'ná aboni níwala o'wéala muchíbalachi. Echálí aboni akaná uchúpaga waminabi ne wabé walubéraga aneli Riosi. <sup>17</sup>Echalí aboni jeanili:

Tamujé mi walú natétara 'ya, mujé Walubela Riosi, ne suwaba omériami.

Mujemi ne Walubela ju jipi rawé, ayénachómi sinibí ne Walubela níli, ayénachómi sinibí niráa ne Walubela níima.

Jipi tamujé mi walú natétara 'ya mapujítimi ma wilíbalí mapurigá ne Walubela niráa, ayénachómi ma o'wínali nulayá jena'í wichimóbachi.



<sup>18</sup> Jena'í wichimóbachi piréami pagótami ma ne wabé na'áwali mi sayéraga, chopi ma seba mapalí Mujemi ma kastigo 'yama echi jaré ke bichíyami pagótami, ayénachó mapalí Mujemi justicia olama ne si'néami echi jaré pagótami mapu ikí ma suwíami ju. Echali' Mujemi galabéala 'yama echi jaré Mujé piónawala mapu ikí nawesa mujé jiti rugá. Echali' Mujemi echirigá galabéala 'yama ne si'néami echi jaré Mujé pagótamawala si'néami mapu ikí olali mapurigá Mujemi nakili. Echali' Mujemi echirigá galabéala 'yama echi jaré mapu ikí kuchípala ju, ayénachó echi auché jaré mapu ikí o'wéala ju. Jipi ma seba mapalí Mujemi waminá suwábama si'néami echi jaré chati oláami pagótami mapu ayénachó wikanáami suwábali jena'í wichimóbachi.

<sup>19</sup> Echali' Riosi ri'obáwalachi echo'ná ripá riwigachi nirúami ma iráparami níili. A'lí biché echo'ná pachá riwirúami níili echi galabé kajoni mapu Riosi chabénala nulali niwánala mapurigá echi jaré Isaeli pagótami sinibí galá 'natama mapurigá Riosi bachá katéwali aboni yuwa. A'lí echali' we yáati ne wabé ni'wili, ayénachó ne wabé iwéami aneli, ayénachó ne wabé iwéami ri'oli, ayénachó ne wabé nokali kawí, ayénachó ne wabé rujuili rijé.

**Echi bilé walubé mukí, echi walubé sitákami namuti wabé apalúami yuwa**

**12** A'lí ke sayiná bilé walubé namuti machínali echo'ná ripá nolírali: Bilé mapuyiri mukí, ne walubé, echo'ná riwirúami níili, ne noligá atíami echi rayénali mapurigá binói sipúchala niráa, ayénachó echi michá ri'léami asali echo'ná echi mukí ronólachi, ayénachó echo'ná binói mo'ólachi echi mukí koyétarami niráa níili, makói miná okuá sopolí jiti. <sup>2</sup>A'lí echi mukí bocháami níili, echijiti binói wabé okoka ne wabé risúu anili mapujiti we yáati ranamea riwéali bilé táa. <sup>3</sup>Echali' echo'ná ripá nolírali ayénachó machínali auché bilé walubé majáriami namuti: Ke sayiná machínali bilé walubé sitákami namuti wabé aparúami. Échiko kichao mo'wéami níili, ayénachó makói awéami níili, ayénachó echo'ná ibílana binói mo'ólachi echi wabé aparúami namuti, oro niwárami, koyétarami níili mapurigá kichao o'wéala silfami niráa. <sup>4</sup>A'lí echi walubé sitákami namuti, wabé aparúami, binói wasila jiti banisuka ri'lé wichí u'luli ne noguí nasipa echi jaré sopolí ripá riwigachi nirúami. Echali' echi walubé aparúami namuti bacháami chukúbali echi mukí yuwa, echi mapu ma ranamea riwéali bilé taá, mapurigá binói we yáati suwábama echi mukí ranala mapalí nawama. <sup>5</sup>A'lí echi mukí nawárali bilé taá towí, echi mapu ma ochérasa, ne wabé iwéami Nuláami níima riwéali, ne suníami jena'í wichimóbachi piréami yuwa, mapurigá ne wabé Walubela niráa. A'lí echi mukí Ranala waminá wísaka, echo'ná ripá riwigachi torúami níili, mapurigá Binói, Riosi yuwa asimea echo'ná Riosi níwala walubela asíbalachi. <sup>6</sup>Echali' echi mukí waminá másali, echo'ná biléana waná kawichí, mapo'ná Riosi ma a'lárali mapurigá echi mukí galá tibútarami níima bilé mili, miná okuá kiento, miná usansa makói rawé iyénasí.

<sup>7</sup>A'lí pe wi'libeko echo'ná ripá riwigachi echi jaré wikabé o'wéala Riosi kapitánawala ne wabé nakówali echi walubé sitákami namuti sayéraga. Echali' echi ne walula Riosi kapitánawala, Migueli riwéami, we nikówali; ayénachó ne si'néami echi auché

jaré Riosi kapitánawala nakówali, echi wabé aparúami walubé sitákami namuti sayéraga, ayénachó sayéraga binói kapitánawala. Echalf echi wabé aparúami sitákami namuti ne wabé nikówali, ayénachó binói níwala kapitani ne wabé nakówali, <sup>8</sup>chopi aboni waminá oméralati. A'lí aboni waminá machí a'wálati, echo'ná ripá riwigachi jonsa. <sup>9</sup>Echi walubé sitákami namuti, wabé aparúami, échiko echi riablo ju, echi mapu Satanasi riwé. Échiko sinibí wabé 'yékiami ju jena'í wichimóbachi piréami pagótami. Echi riablo mapuyiri bilé sayawi ju, ki'yá jonsa nirúami. A'lí echi riablo echo'ná ripá riwigachi jonsa machí pátami níili, jena'í wichimóbachi yénasí, ayénachó echi jaré wikabé binói kapitánawala echirigá machí u'lítami níili echi riablo yuwa.

<sup>10</sup>Echalf nijeni námali bilé o'welí ra'íchami mapu echo'ná ripá riwigachi ra'íchali jeanigá: Ma sébali mapalí tamujé Riósawala ne sébali ku'wírama si'néami mapu ikí Binói pagótamawala ju. Jipi tamujé Riósawala sébali omériga olama, mapujiti Binói ne suwaba omériami ju. Jipi jonsa tamujé Riósawala sébali nulema si'néami pagótami, mapurigá aboni Walubela Silínawala niráa. Jipi jonsa echi Walubela Jesucristo mapu Riosi júuli, ne sébali wabé Walubela níima mapujiti ma machí pátami níili echi wabé wi'nijíami riablo. Échiko sinibí rawé, sinibí rokogó wabé wi'nijika ruyeli Riosi echi jaré bichíyami sayéraga. <sup>11</sup>Echi jaré bichíyami ma omérali echi riablo, mapujiti aboni galá bichíili mapurigá echi Riosi níwala Méchuli waminá mi'líruami níili, aboni chati olalila jiti, ayénachó mapujiti aboni galá bichíili echi Galabé Riosi Ra'íchala, mapurigá aboni galá nawésali echi auché jaré pagótami. A'lí mapalí echi auché jaré pagótami wabé ko'wináali echi jaré bichíyami, echalf aboni ketasi majali mapurigá aboni echirigá ko'wirúami níima, chopi aboni waminabi galabé nirali mapurigá aboni waminá suwimea, mapurigá aboni echo'ná ripá riwigachi muchima. <sup>12</sup>Echijiti ne wabé kanílasí 'yemi echo'ná riwigachi piréami. Chopi ne wabé simírami risúu olárami níima echi jaré mapu abijí jena'í wichimóbachi pireko, echi jaré echo'ná walú ba'wírali moba 'yéami ayénachó, mapujiti echi riablo ma ne wabé simírami yoka ku rikínali echo'ná mapo'ná 'yémitamo muchuwi. A'lí echi riablo ne wabé simírami yoli echirigá, mapujiti binói galá machí mapu ke 'me ayó binói arigá waminá ri'lé walubé na'írali pátami níima, mapo'ná binói walú kastigo 'yárami níima ne sinibí niráa.

<sup>13</sup>A'lí mapalí echi riablo ma echo'ná ripá riwigachi jonsa pátami níili, jena'í wichimóbachi yénasí, echalf binói ne wabé risúu ologá a'najátali echi mukí mapu chabénala ranali echi taá towí, binói ranala. <sup>14</sup>Chopi echi mukí 'yárami níili mapuyiri okuá echi walubé a'wé analá, mapurigá omérama wabé sapú i'nísiya echo'ná waná kawichí mapalí echi riablo, mapurigá bilé walubé sinowi niráa, wabé najátama. Echalf echi mukí echirigá másali echo'ná waná kawichí mapo'ná Riosi ma a'lárali mapurigá echi mukí 'yárami níima ko'wáami bikiyá bamíbbali miná nasipa yénasí. <sup>15</sup>Echalf echi riablo, mapuyiri walú sinowi, machí pali walubé ba'wí echo'ná binói chumulachi jonsa, mapurigá walubé buwíbama ba'wí mapurigá biléana bakochi niráa echo'ná jubáami mukírali, mapurigá echi mukí waminá apésarami níima echi walubé ba'wí jiti. <sup>16</sup>Chopi echi kawí ku'wírali echi mukí, mapujiti echi kawí wi'lé chikali echo'ná mukírali jubá okuá, a'lí echi walubé ba'wí, mapuyiri biléana bakochi, suwaba echo'ná pachana wi'yérali bakili, kara mapu echi walú sinowi machí pali echo'ná binói chumulachi jonsa. <sup>17</sup>Echijiti echi wabé aparúami riablo mapuyiri sinowi waminabi ne wabé yoli, echi mukí sayéraga. A'lí binói nikónalaga

simili, echi auché jaré echi mukí kúchuwala sayérasiya, si'néami mapu ikí olako mapurigá Riosi nuleli aboni olánala, si'néami mapu ikí sinibí galá bichífiga olako achigórigá mapurigá aboni nawésarami níili Jesucristo Ra'fchala.

### Echi okuá wabé jobátami namuti

**13** Echali nijeni wilfbali echo'ná walubé ba'wírali suwé satérali. A'lí nijeni riwali bilé wabé aparúami namuti echo'ná walú ba'wírali jonsa machínami, echi mapu kichao mo'wéami níili, ayénachó makói awéami níili. A'lí echo'ná ibílana binói awálachi, échiko oro niwárami koyétarami níili mapurigá waluba silfami niráa. A'lí echo'ná ibílana mo'ólachi bilé riwá osirúami níili, echi mapu ne wabé sitila anigá wabé sayérami níili echi Walubela Riosi sayéraga. <sup>2</sup>A'lí echi wabé aparúami namuti mapu nijeni riwali mapuyiri bilé tigre anilíwami níili, chopi mapuyiri ojuí ronéami níili, ayénachó mapuyiri mawiyá chu'wéami níili. A'lí echi riablo 'yali mapurigá echi wabé aparúami namuti ne wabé jiwérami níima, ayénachó echi riablo wilali echi wabé aparúami namuti mapurigá walubela niráa, mapurigá échiko asimea echo'ná biléana ripabé wilfami walubela asíbalachi, ayénachó mapurigá binói wabé omériga olama mapurigá walubela niráa. <sup>3</sup>Echali nijeni riwali mapu biléana mo'ochí echi we aparúami namuti mo'ólachi chabénala mapurigá wabé simírami chi'wanárami niráa níili, mapuyénasí echi wabé aparúami namuti ma mukumea riwéali, chopi échiko arigá ma ku sa'wárami níili. Echijiti ne si'néami jena'í wichimóbachi piréami galá o'wikeka najátali echi wabé aparúami namuti yuwa, ayénachó ne si'néami pagótami wabé walubéraga aneli echi wabé aparúami namuti. <sup>4</sup>A'lí aboni ayénachó wabé o'wikeka walubéraga aneli echi wabé aparúami riablo mapujiti binói ma wilali echi wabé aparúami namuti mapurigá walubela silfami niráa. Echali echi jaré pagótami jeanigá walubéraga aneli echi wabé aparúami namuti: Ke wesi auché bilé nirú echiyena walubela mapurigá echi wabé aparúami namuti. Ke wesi omérama echi wabé aparúami namuti.

<sup>5</sup>Echali echi wabé aparúami namuti wabé nóchaga ra'fchali Riosi sayéraga, a'lí Riosi ketasi cho kastigo 'yali chopi Riosi ariweli mapurigá echi wabé aparúami namuti wabé nulama mapurigá walubela silfami niráa, nawosa makói miná okuá michá yénasí. <sup>6</sup>A'lí echi wabé aparúami namuti echirigá wabé sitírarigá ra'fchali Riosi sayéraga, ayénachó wabé sitila aneli Riosi riwala, ayénachó sitila aneli Riosi ri'obáwala, ayénachó wabé sitírarigá ra'fchali echi jaré echo'ná ripá riwigachi muchúami sayéraga. <sup>7</sup>Echali echi wabé aparúami namuti 'yárami níili mapurigá wabé nikówaga waminá omérama echi jaré Riosi níwala pagótami, si'néami mapu ikí abijí tibili jena'í wichimóbachi, ayénachó 'yárami níili mapurigá walubela silfami níima ne suníami jena'í wichimóbachi, mapurigá ne si'néami pagótami silínawala níima ne suníami jena'í wichimóbachi piréami, ayénachó mapurigá ibili echi jaré wikabé isena ra'fchami pagótami silínawala níima ne buchuwímana jena'í wichimóbachi piréami. <sup>8</sup>Echali si'néami echi jaré jena'í wichimóbachi piréami pagótami mapu ikí ketasi Riosi níwala níili wabé o'wikeli echi wabé aparúami namuti. Chopi echi jaré Riosi níwala pagótami mapu ikí tibili jena'í wichimóbachi ketasi o'wikeli echi wabé aparúami namuti. A'lí k'iyá chokichí mapalí je'ná kawí niwárami níili, ne si'néami echi jaré pagótami riwalá mapu ikí bichíima riwéaliko ma osirúami níili echo'ná echi Méchuli osilíwalachi mapurigá aboni sinibí piréami níima riwéali. A'lí echi Méchuli níili mapu waminá mi'lirúami níili.

<sup>9</sup>Si'néami 'yemi mapu ikí mámiame juko, ne galá namsi je'ná: <sup>10</sup>A jaré pachá mo'wásagá auché jaré mapu tarapé chibi nokuáami ju, abóniko ayénachó pe waminánomí achigórigá pachá mo'wárami níima. A'lí a jaré pagótami waminá ko'wisáagá auché jaré, abóniko ayénachó achigórigá ko'wirúami níima pe waminánomí. Echijiti galá níima mapu si'néami echi jaré Riosi níwala pagótami galá kilí ologá piréami níima, ayénachó mapu aboni ne galá bichíyami níima Jesucristo niráa.

<sup>11</sup>Pe wilibeko nijeni riwali auché bilé wabé aparúami namuti jena'í wichimóbachi jonsa machínami. Échiko okuá awéami níili mapurigá bilé táa bo'wá, chopi binói wabé o'wéli niráa ra'fchali mapurigá echi wabé aparúami riablo. <sup>12</sup>A'lí je'ná osáala wabé aparúami namuti achigórigá ne wabé omériga nuléami níili jena'í wichimóbachi piréami pagótami, mapurigá echi bacháwala wabé aparúami namuti nuléami níili, mapujiti echi bacháwala echirigá 'yali mapu wabé omériga nulema. A'lí echi osáwala wabé aparúami namuti 'wériga nulega olali mapurigá si'néami jena'í wichimóbachi piréami bacháami chokoba jaga o'wikema echi bacháwala wabé aparúami namuti, echi mapu ku sa'wili mapalí binói chabénala wabé chi'wanárami níili, mapuyénaś arigá mukumea riwéali. <sup>13</sup>Ayénachó echi osáwala aparúami namuti ne wabé omériga olali mapurigá ke wesi pagótami omérali olayá, mapujiti binói olali mapurigá na'í rikínama echo'ná ripá nolírali jonsa, mapalí echi jaré pagótami echo'ná 'nigá jalí. <sup>14</sup>Echirigá echi osáwala wabé aparúami namuti wabé 'yékali jena'í wichimóbachi piréami pagótami mapalí binói 'wérali olali mapurigá ke wesi auché jaré omérali olayá, mapujiti echi bacháwala aparúami namuti 'yali mapu echirigá omériga olama. Echalí echi osáwala aparúami namuti nuleli echi pagótami niwánala bilé walubé amachíkalawami namuti mapuyiri echi bacháwala aparúami namuti, echi mapu arigá waminabi bitéali mapalí binói ripiyá jiti chi'wanárami níili. <sup>15</sup>A'lí echi osáwala aparúami namuti ayénachó 'yárami níili mapurigá binói omérama galá iwítiya echi walubé amachíkalawami namuti, echi mapu niwárami níili mapuyiri echi bacháwala aparúami namuti, mapurigá echi amachíkalawami namuti arigá ra'ichama, ayénachó mapurigá nulama ko'wínala si'néami pagótami mapu ikí ketasi bacháami chokoba jábaga o'wikeko echi binói amachíkalawami namuti. <sup>16</sup>A'lí echi osáwala aparúami namuti waminabi omériga ologá, ayénachó nulali mapurigá ne si'néami pagótami bawirárami níima echo'ná aboni sikálachi watoná, echo'ná aboni kowálachi omá. Echalí binói nuleli echirigá bawiránala echi jaré kuchipala, ayénachó echi auché jaré o'wéala. Binói nuleli echirigá bawiránala echi jaré wabé níwami, ayénachó echi jaré tisúwati. Binói nuleli echirigá bawiránala echi jaré nuláami, ayénachó echi jaré pióntami. Echirigá echi osáwala aparúami namuti nuleli bawiránala ne si'néami pagótami. <sup>17</sup>Echi wabé aparúami namuti nulali mapu echalí rawé ke wesi omérama namuti ralayá, nibilé wesi omérama namuti raline, chopi echi jaré mapu ikí bawirárami níimako mapurigá echi wabé aparúami namuti nulali, abóniko omérama. Ayénachó echi jaré mapu ikí osirúami juko echo'ná abónichi echi namuti wabé aparúami riwalá, abóniko ayénachó omérama. Ayénachó echi jaré mapu echo'ná abónichi osirúami ju echi namuti wabé aparúami níwala taráwami, abóniko ayénachó omérama. <sup>18</sup>A'lí echi jaré galá machíami pagótami chopi omérama machiyá je'ná jeyiri. Echijiti 'yemi máputamo galá machíami ju, ne galá 'nátaga machisí chu kipu ju echi wabé aparúami namuti níwala taráwami,

mapujiti mapurigá echi pagótami tará, je'ná ju binói níwala taráwami: Usani kiento, usansa makói, miná usani.

**Echi nawajíwami mapu echi 144,000 pagótami nawajili**

**14** Pe wilibeko nijeni 'néniga riwali mapu echi Méchuli chukuli echo'ná galabé chulichichi, Siónachi anilíwachi. A'lí Binói yuwa jali auché jaré wikabé, bilé kiento miná nawosa makói miná naó mili pagótami. A'lí echo'ná aboni kowálachi ibili osirúami níli echi Méchuli riwalá, ayénachó osirúami níli echi Binói Onolá riwalá. <sup>2</sup>Echalí we yáati nijeni námali o'weli anéchanami echo'ná ripá riwigachi, mapurigá o'weli ané mapalí ne walubé bu'wiba ba'wí echo'ná wikanáami bakochi, ayénachó aneli mapurigá ukuí ne wabé iwéami ri'óami, ayénachó aneli mapurigá wikabé táami niráa, mapalí aboni sinepi niráa taa echi tákawami namuti, arpa anilíwami. <sup>3</sup>Echalí echi wikabé pagótami echo'ná bacháami jali, echo'ná echi walubela asíbalachi, mapo'ná Riosi Binói atí, ayénachó aboni bacháami jali echi naó akami namuti yuwa, ayénachó bacháami jali echi osá makói miná naó o'wéala ochérami yuwa. A'lí echi wikabé pagótami nawajili bilé bukulíwami nawajíwami. A'lí ke wesi auché jaré omérali binée echi bukulíwami nawajíwami, chopi echi jaré wikabé, bilé kiento miná nawosa makói miná naó mili pagótami, abóniko chopi galá omérali binée echi nawajíwami. Abóniko ma Riosi jiti ku'wíratami níli, ayénachó aboni 'wísarami níli jena'í wichimóbachi jonsa. <sup>4</sup>Je'ná wikabé pagótami ketasi bilé chati oláami ju, mapujiti aboni galá bichíli Jesucristo niráa. Abóniko we najata echi Méchuli, chuwé biléanomí mapo'ná Binói iyena. Je'ná jerigá aniwáami ju: Mapu aboni chopi olá mapurigá echi Walubela Jesucristo nulé aboni. Je'ná wikabé jena'í wichimóbachi piréami ma ku wikawárami níli. A'lí aboni bachá niráa 'yárami níli Riosi, ayénachó aboni bachá niráa 'yárami níli echi Méchuli, mapurigá echi jaré Juríosi pagótami sinibí bachá niráa 'yali Riosi jaré pe okuá aboni níwala 'wírami namuti. <sup>5</sup>A'lí aboni tarapé siné ikaleka ra'íchami níli, nirapé chati oláami níli bacháami Riosi yuwa.

**Bikiyá o'wéala Riosi kapitánawala je'ná jerigá nawésali**

<sup>6</sup>Echalí nijeni riwali auché bilé walula Riosi kapitánawala, echi mapu echo'ná ripabé nasipa nolírali i'nika iyénali. Échiko nawisánalaga julárami níli echi Galabé Riosi Ra'íchala, echi mapu sinibí niráa ku'wíriami ju echi pagótami. Échiko echirigá nawésanala julárami níli ne suníami jena'í wichimóbachi piréami pagótami, ne buchuwímana o'wéalachi piréami, mapu chubiyiri isena ra'íchali ra'íchami níli, ayénachó mapu chubiyiri jaré isena pagótami níli. <sup>7</sup>Échiko o'weli ra'íchaga jeanigá nawésali: Ne wabé majaga walubéraga anesi Riosi, mapujiti ma sébali mapalí Binói walú kastigo 'yama si'néami mapu ikí chati oláami ju. Chokoba jaga o'wikesi echi Riosi mapu niwáli ne suwaba namuti echo'ná ripá riwigachi nirúami, Echi mapu niwáli je'ná kawí, Echi mapu ayénachó niwáli echi walubé ba'wí, Echi mapu ayénachó niwáli ne suníami bajichi.

<sup>8</sup>A'lí pe jubáami auché bilé walula Riosi kapitánawala ayénachó echo'ná ripabé nasipa nolírali i'nika yénali. Échiko ayénachó nawésali jeanigá: Ma suwaba najuli echo'ná walubé walúlachi Babilóniachi anilíwachi, mapujiti echo'ná piréami pagótami wabé simírami chati oláami níli, ayénachó aboni wabé chati olírali ne suníami jena'í wichimóbachi piréami pagótami.

<sup>9</sup>Echalí pe jubáami auché bisáwala walula Riosi kapitánawala echo'ná ripabé nasipa nolírali i'nika iyénali. Échiko o'weli ra'íchali jeaníga: A jaré chokoba jaga o'wikésagá echi wabé aparúami namuti, ayénachó a jaré chokoba jaga o'wikésagá echi walubé amachíkalawami namuti mapu niwárami níli mapuyiri echi wabé aparúami namuti, ayénachó a jaré arigá bawirárami nísagá echo'ná aboni kowárachi, echo'ná aboni sikálachi omá, mapurigá echi wabé aparúami namuti nulé, <sup>10</sup>arigá 'wérali níma mapu aboni ne wabé walubé kastigo 'yárami níma, mapalí Riosi ne wabé yoga, walubé kastigo 'yama si'néami chati oláami pagótami. A'lí aboni wabé risúu olárami níma echo'ná wabé chati na'írali mapo'ná echi asújeri anilíwami ayénachó rajamea. Echali echi jaré galabé Riosi kapitánawala galá riwimea mapalí aboni echirigá risúu olárami níma, ayénachó echi Méchuli echirigá riwimea. <sup>11</sup>A'lí aboni ne sinibí niráa echirigá wabé risúu olárami níma echo'ná wabé chati na'írali, mapo'ná sinibí ne wabé molínama. A'lí si'néami echi jaré mapu ikí chokoba jaga o'wiké echi bacháala wabé aparúami namuti ke siné isábama, nibilé siné rawé, nibilé siné rokogó, echi jaré mapu ikí chokoba jaga o'wikeko echi walubé amachíkalawami namuti ketasi cho, echi jaré mapu ikí bawirárami nímakó mapurigá echi osáwala aparúami namuti nulé, ketasi cho. <sup>12</sup>Echijiti galá níma mapu echi jaré Riosi níwala pagótami sinibí galabé kilí ologá pirélama, si'néami mapu ikí galá nijéwaga olá mapurigá Riosi nulé aboni, si'néami mapu ikí sinibí waminabi galá bichíísamiko echi Walubela Jesucristo niráa.

<sup>13</sup>A'lí nijeni námali bilé Ra'íchami mapu echo'ná ripá riwigachi jonsa tamí jeaneli: Je'ná jerigá osá: Ne wabé kaníliami níma echi jaré bichíyami mapu jipi jonsa suwiméako, si'néami mapu ikí bichíyami ju echi Walubela Jesucristo niráa. Echi Wabé Galabé Riosi Iwigala bichíwaga aní mapu aboni ne wabé kanílama, mapujiti ma ketasi 'wérali níma mapu aboni ne wabé nochama, chopi aboni ma galá isábama, ayénachó aboni galá ku natétarami níma mapujiti aboni ma galabé ologá piréali.

### **Si'néami chati oláami pagótami walú kastigo 'yárami níma**

<sup>14</sup>A'lí nijeni 'néniga riwali bilé wabé rosákami nolí. A'lí echo'ná ripá moba nolírali asali bilé Walubela, a'lí échiko mapuyiri bilé rijói níli. Echo'ná Binói mo'ólachi échiko koyétarami níli bilé oro niwárami mapuyiri koyela, ayénachó bilé mapuyiri ripiyá chapigá asali ne wabé oláami. <sup>15</sup>Echalí auché bilé walula Riosi kapitánawala machínali echo'ná ri'obachi jonsa, ripá riwigachi nirúami. Échiko o'wali ra'íchaga jeaneli echi Bilé mapu echo'ná ripá moba nolírali asali: Ma o'winá sikilée echo'ná wichimóbachi nirúami uva anilíwami rakéami namuti, mapujiti ma wáami ju, echijiti ma sébali sikirékowachi. Ma sébali ne jubá rawé, mapalí si'néami echi jaré wichimóbachi piréami pagótami justicia olárami níma.

<sup>16</sup>Echalí Echi mapu echo'ná ripá moba nolírali asali ma suwaba sikireli jena'í wichimóbachi nirúami uva anilíwami rakala. Je'ná jerigá aniwáami ju: Mapu ne si'néami pagótami jena'í wichimóbachi tibíami ma napabúrami níli, achigórigá mapurigá echi uva sikiréami waminá napabú echi uva rakala mapalí ma wáami ju.

<sup>17</sup>A'lí auché bilé walula Riosi kapitánawala machínali echo'ná ri'obachi jonsa ripá riwigachi nirúami. Échiko ayénachó bilé mapuyiri ripiyá chapigá iyénali, ne wabé oláami. <sup>18</sup>Ayénachó auchecho bilé walula Riosi kapitánawala machínali echo'ná ri'obachi jonsa, mapo'ná echi jaré namuti ko'yagá ikósaga 'yálati Riosi. A'lí



échiko wabé omériami níili walubé na'í niwayá jena'í wichimóbachi. Echali échiko o'weli ra'fchali echi auché bilé Riosi kapitánawala mapu chapigá iyénali echi wabé oláami ripiyá, jeanigá: We yáati o'winá napabuya si'néami jena'í wichimóbachi tibíami pagótami, achigórigá mapurigá echi uva icháami waminá sikireka napabú suwaba echi uva rakala, mapujiti ma sébali ne jubá rawé mapal'í si'néami pagótami justicia oláami níima.

<sup>19</sup>Echalí echi walula Riosi kapitánawala napabuli si'néami jena'í tibíami pagótami achigórigá mapurigá echi uva níwami ripúnaga napabú echi uva rakala. Echali echi pagótami napabúrami níili mapurigá Riosi justicia olama aboni yuwa. Alí Riosi walú kastigo 'yali echi pagótami, achigórigá mapurigá echi jaré uva níwami wabé kamina echi wikabé uva rakala mapurigá galá machínama echi ba'wila chopi. <sup>20</sup>Alí echi jaré wikabé pagótami echirigá ko'wirúami níili mulubé echo'ná walúlachi. Echali ne walubé maníbali la mapurigá walubé maniba echi uva ba'wila mapal'í echi jaré icháami kamina echi wikabé uva rakala, mapujiti mulubé echo'ná walúlachi ne wabé rokóami maníbali echi la mapuyénasí bilé kawé chumulachi sébali, ayénachó echi la wabé rokóami wi'libé ra'laka manili, mapuyénasí bikiyá kiento kilómetro niráa.

**Echi jaré kichao o'wéala liosi kapitánawala mapu julárami níili kicháosa niráa walú kastigo 'yánala jena'í wichimóbachi tibíami pagótami**

**15** Alí nijeni riwali auché jaré wabé simírami o'weli karúmati, ne wabé majárami, echo'ná ripabé nol'rali 'yéami. Nijeni riwali kichao o'wéala Riosi kapitánawala echo'ná ripá 'yéami, echi jaré mapu ne wabé omériami níili nulayá mapurigá wiká karúmati jiti ma ne jubá ne kicháosa niráa ne wabé simírami risúu olárami níima jena'í wichimóbachi tibíami pagótami. Alí echali jonsa Riosi ma ketasi waminabi kastigo 'yama riwéali echi jaré pagótami jena'í wichimóbachi.

<sup>2</sup>Ayénachóni riwali biléana mapuyiri wi'lé ipó, ne wabé wi'límala mapurigá echi walú ba'wechi niráa. Echo'ná moba ne buchuwímána mapurigá sipée niráa níili, chopi ayénachó rajáami níili mapurigá na'í niráa. Alí echo'ná moba jáwami riwálini ne si'néami echi jaré pagótami mapu ikí ma nayúrali echi bacháwala wabé aparúami namuti sayéraga, ne si'néami mapu ikí ke bilé cho amachíkali echi walubé amachíkalawami namuti mapu niwárami níili mapuyiri echi bacháwala wabé aparúami namuti, ne si'néami mapu ikí ke bilé siné bawirárami níili mapurigá echi bacháwala wabé aparúami namuti nuleli, ne si'néami mapu ikí ke bilé osirúami níili echo'ná abónichi echi bacháwala wabé aparúami namuti riwalá tarálawala. Alí ne si'néami aboni níwami níili arpa anilíwami tákawami namuti mapu Riosi Binói 'yali. <sup>3</sup>Echalí ne si'néami aboni nawajía jali echi Moisesi nawajíwala, echi mapu Riosi piónawala níili, ayénachó aboni nawajía jali echi Méchuli nawajíwala jeanigá:

Mujé ne Walubela Riosi suwaba omériami ju. Mujemi ne wabé galabé olali suwaba mapu ikimi olali.

Mujemi sinibí ne wabé wachínaga olá, ayénachómi ne bichíwaga aní.

Mujemi ne Walubela Silíami ju si'néami jena'í wichimóbachi piréami pagótami silínawala.

<sup>4</sup>Ne si'néami pagótami mi majaga o'wikema, Mujé tamujé Walubélawala. Ne si'néami pagótami mi walubéraga anema.

Mujemi chopi ne wabé galabé oláami ju, echijiti ne sunfami piréami pagótami mi yuwa sigá wabé o'wikema, mapujiti aboni ma galá machíralati mapurigá Mujemi sinibí ne wabé wachínaga olali.

<sup>5</sup>A'lí ma je'ná jerigá ikisá, echalí we yáati nijeni riwali irápalawami echo'ná ripá riwigachi mapo'ná Riosi atí. <sup>6</sup>Echalí echi kichao Riosi kapitánawala ku buyali echo'ná jonsa mapo'ná Riosi atí. Aboni wabé omériami níili nulayá mapurigá jena'í wichimóbachi tibíami pagótami kicháosa niráa ne wabé simírami risúu olárami níima. A'lí ibili echi kichao Riosi kapitánawala ne wabé bi'wíami napáchami níili, mapuyiri napoli ne wabé simírami rosákami niráa, ayénachó echo'ná sulachí, kayé nologá, ibili bulérami níili bilé oro niwárami mapuyiri puli. <sup>7</sup>A'lí bilé echi naó akami namuti ibílipi niráa 'yali jarito oro niwárami echi jaré kichao Riosi kapitánawala. A'lí echi kichao jarito ne buchíami níili wabé chati namuti, risúu oláliami, mapurigá echi Sinibí Bitéami Riosi echijiti wabé risúu ologá walú kastigo 'yama jena'í wichimóbachi piréami pagótami. <sup>8</sup>A'lí echo'ná pachá Riosi ri'obáwalachi ripá riwigachi nirúami, ne wabé buchili molí, mapujiti echi ne Walubela Riosi echo'ná pachá asali, ayénachó mapujiti Riosi ne suwaba omériami ju. Echalí ke wesi omérali mo'wiyá echo'ná pachá ri'obachi mapuyénasí echi jaré kichao Riosi kapitánawala ke cho sunili kicháosa niráa ne wabé simírami risúu olayá jena'í wichimóbachi tibíami ke bichíyami pagótami.

**Echi kichao jarito ne buchíami echi wabé chati namuti, risúu oláliwami**

**16** Echalí nijeni námali bilé o'weli ra'íchami echo'ná pachá ri'obachi ra'icháchanachi, echi mapu jeaneli echi kichao Riosi kapitánawala: Simíbagá, suwaba ku'luwasi echo'ná wichimóbachi echi kichao jarito, echi mapu maníami ju echi wabé chati namuti risúu oláliwami, echi mapujiti Riosi wabé risúu ologá kastigo 'yama echi jaré ke bichíyami pagótami.

<sup>2</sup>Echalí echi bacháwala Riosi kapitánawala simigá ku'luwali binói níwala jarito jena'í kawírali moba. A'lí we yáati si'néami echi jaré pagótami ne wabé charigá chánali, ne wabé chati júkami niráa. Echijiti aboni ne wabé okoli, si'néami mapu ikí bawirárami níili mapurigá echi bacháwala wabé aparúami namuti nuleli, si'néami mapu ikí chokoba jaga o'wikéliko echi walubé amachíkalawami namuti mapu niwárami níili mapuyiri echi bacháwala wabé aparúami namuti.

<sup>3</sup>A'lí echi osáwala walula Riosi kapitánawala ku'luwali binói níwala jarito echo'ná walubé ba'wechi moba. Echalí echi walubé ba'wí suwaba waminá lá najítali, mapurigá bilé mukúami lalá niráa. A'lí suwaba namuti echo'ná walubé ba'wírali nirúami, we yáati waminá suwili.

<sup>4</sup>A'lí echi baisáala walula Riosi kapitánawala ku'luwali binói níwala jarito echo'ná moba sunfami bakochi jena'í wichimóbachi nirúami, echo'ná moba sunfami bajichi ayénachó. Echalí suwaba echi ba'wí káraga lá najítali. <sup>5</sup>A'lí bicheni námali ra'icháchanachi auché bilé Riosi kapitánawala, echi mapu nulérami níili tibútanala sunfami jena'í wichimóbachi maníami ba'wí. Échiko jeanili: Mujé Riosi ne wabé simírami galabé oláami jumi, ayénachómi sinibí niráa echirigá galabé oláami níili. Mujemi ne wabé wachínaga olali mapalimi echirigá nulali kastigo 'yánala echi jaré ke bichíyami pagótami, <sup>6</sup>mapujiti aboni ne wabé léntaga ko'yali jaré mujé níwala galabé bichíyami pagótami, jaré Riosi jiti nawésami pagótami ayénachó. A'lí jipi Mujé Riosi ayénachó 'yali

mapurigá aboni bajima lá, mapujiti galá níli mapu aboni echirigá kastigo 'yárami ními.

<sup>7</sup>Ayénachó nijeni námali auché bilé Riosi kapitánawala ra'icháchanachi, echi mapu echo'ná pachá Riosi ri'obáwalachi asali, ne mulubé mapo'ná chukuli echi jubétachi mapo'ná chabénala echi jaré karúmati namuti ikósaga 'yálati Riosi. Échiko, Riosi yuwa ra'ichaga jeaneli: Mujé Walubela Riosi ne suwaba omériami jumi, ayénachómi ne bichíwali galá wachínaga olali mapalimi echirigá nulali.

<sup>8</sup>A'lí echi nawosa Riosi kapitánawala ku'lúwali binói níwala jarito echo'ná rayénalachi moba. A'lí echi rayénali echijiti waminabi ne wabé simírami ratábali, a'lí echi pagótami echijiti we rajali. <sup>9</sup>Si'néami jena'í wichimóbachi tibíami pagótami echirigá wabé rajali mapujiti echi rayénali ne wabé simírami ratábali, chopi aboni tarapé cho aliweli chati olayá, nibilé cho waminabi walubéraga aneli Binói. Echálí aboni chopi ne wabé sitila aneli echi Riosi mapu echirigá ne wabé omériga olali mapurigá aboni risúu olárami níma.

<sup>10</sup>A'lí echi malisa Riosi kapitánawala ku'lúwali binói níwala jarito echo'ná moba mapo'ná echi bacháwala wabé aparúami namuti asali mapurigá walubela silíami niráa. Echálí ke sayiná ne wabé rukuáwali echo'ná kanápuromí mapo'ná echi bacháwala wabé aparúami namuti wabé nuláami níli, ayénachó echo'ná tibíami pagótami ne wabé simírami okoli, ayénachó aboni ikili aboni cha'mélawala mapurigá echijiti ma ketasi 'me newalama mapurigá aboni ne wabé simírami okoli. <sup>11</sup>Echálí echi chati oláami pagótami ne wabé sitíila aneli echi Riosi, ripá riwígachi atíami, mapujiti aboni echirigá ne wabé risúu olárami níli, ayénachó mapujiti ma ne wabé chati chánali mapo'ná aboni rajali, chopi aboni tarapé cho ariweli chati olayá, nibilé cho walubela aneli Riosi.

<sup>12</sup>A'lí echi usansa Riosi kapitánawala ku'lúwali binói níwala jarito echo'ná moba walubé bakochi Eujarátachi anilíwachi. A'lí echo'ná bakochi suwaba wakicheli echi ba'wí, mapurigá echo'ná simárama echi jaré mikabé panina jonsa simíbami o'wéala silíami, wikabé aboni sontársawala yuwa.

<sup>13</sup>A'lí nijeni riweli bikiyá wabé chati isena aliwá. Echi bilé machínali echo'ná echi wabé aparúami riablo chumilachi jonsa, auché bilé machínali echo'ná echi bacháwala wabé aparúami namuti chumilachi jonsa, a'lí auché bilé machínali echo'ná echi osáwala wabé aparúami namuti chumilachi jonsa, echi mapu ne wabé 'yéka nawésami níli. A'lí bikiyana echi wabé chati isena aliwá mapuyiri rimó sakuá níli. <sup>14</sup>A'lí je'ná bikiyá chati isena riablo aliwala níli. Bikiyana wabé omériga olali mapurigá ke wesi pagótami omérali olayá. Echálí aboni napabú 'yénali ne suníami jena'í wichimóbachi nuláami o'wéala silíami, ne si'néami aboni pagótamawala yuwa, mapurigá ne si'néami ne wabé nakoma echálí ne jubá rawé, mapalí echi suwaba omériami Walubela Riosi walú kastigo 'yama echi jaré ke bichíyami pagótami. <sup>15</sup>Jesucristo jeaní: ¡Galá 'nesi! Nijeni ke sayiná ku nawama, mapurigá bilé chigórami ke sayiná nawá. Ne wabé kaníliami níma echi jaré pagótami mapu ikí aboni niráa tibuka muchímako; mapurigá aboni galá oláami níma echálí ne jubá rawé, mapurigá aboni ketasi riwélama mapurigá echi auché jaré chati oláami pagótami ne wabé riwélatami níma. <sup>16</sup>Echálí echi bikiyá chati isena aliwá napabuli ne si'néami jena'í wichimóbachi nuláami o'wéala silíami, ne si'néami aboni pagótamawala yuwa, echo'ná biléana mapo'ná Aramajerónachi anilíwachi ju, echi jaré Ebreo anilíwami ra'ichala niráa.

<sup>17</sup>A'lí echi kicháosa Riosi kapitánawala ku'lúwali binói níwala jarito echo'ná ikárali. A'lí we yáati echi Walubela Riosi o'weli ra'íchali pachá echo'ná ripá riwigachi nirúami ri'obachi jonsa, mapo'ná Binói atí echo'ná walubela asíbalachi. Echali Riosi jeanili: Jipi ma yénabisi ju.

<sup>18</sup>A'lí we yáati wisabé ne wabé ni'wili, ayénachó ne wabé aneli. A'lí wisabé ne wabé ri'oli, ayénachó ne wabé simírami iwéami nokali jena'í wichimóbachi. A'lí ki'yá chokichí jonsa ke siné echiyena iwéami nokali mapali jonsa piréali pagótami jena'í wichimóbachi. <sup>19</sup>Echali echi walubé walúlachi bikaná niráa rojonárami níli, mapujiti echi wi'yé wi'libé rapali; ayénachó echi auché jaréana o'wéalachi jena'í wichimóbachi nirúami, suwaba waminá najuli. A'lí Riosi ku 'nátaga echi walubé walúlachi Babilóniachi anilíwachi jiti, ne walubé kastigo 'yánali echo'ná piréami pagótami, mapujiti aboni chati oláami níli. <sup>20</sup>A'lí echo'ná walubé ba'wírali nasipa nirúami kawí suníami waminá ko'ná botuwili, ayénachó suwaba chulítami waminá ri'narárami níli. <sup>21</sup>A'lí ripá nolírali jonsa ne o'weli rujuili rijé jena'í wichimóbachi piréami pagótamichi moba. Echali ibili rijé ne wabé bitéami níli, mapuyena nawosa makói kilo. A'lí jena'í wichimóbachi tibíami pagótami ne wabé sitila aneli Riosi, mapujiti aboni ne wabé simírami risúu olárami níli echi wabé o'weli rijé jiti.

#### Echi walula mukí chati sitíi oláami kastigo 'yárami níli

**17** Echali tamí yuwa nawali bilé echi jaré kichao o'wéala Riosi kapitánawala, echi mapu iblípi jarito kami níli. Échiko tamí janeli: Wakiná simí, nijé nimí 'nérama mapurigá walú kastigo 'yárami níma echi walula mukí, wabé chati sitíi oláami, echi mapu echo'ná moba wikanáami walú ba'wírali atí. <sup>2</sup>Echi jaré o'wéala silíami jena'í wichimóbachi nuláami ma wabé chati sitíi ologá kochili echi chati sitíi oláami mukí yuwa. A'lí echi auché jaré pagótami jena'í wichimóbachi tibíami ma mapurigá tékali niráa ju, mapujiti aboni achigórigá chati olánali mapurigá echi chati sitíi oláami mukí olali.

<sup>3</sup>A'lí echi Wabé Galabé Riosi Iwigala tamí jerigá riwírali: Mapurigá bilé walula Riosi kapitánawala echo'ná biléana waná kawichí tamí tora niráa, a'lí echo'nani riwali bilé mukí moba asigá atíami bilé wabé aparúami sitákami namuti, echi mapu buchuwímana ne noligá osirúami níli echo'ná binóichi wikabé ra'íchali mapu Riosi sayéraga aniwáami níli. A'lí echi wabé aparúami namuti kichao mo'wéami níli, ayénachó makói awéami níli. <sup>4</sup>A'lí echi mukí sitákami sipúchami níli, chomítami ayénachó. A'lí échiko oro anilíwami jiti bayóratami níli, jaré wabé simati, wabé natéami rité jiti ayénachó, jaré perla anilíwami jiti ayénachó. A'lí echi mukí chapigá asali bilé jarito oro niwárami mapu ne buchíami níli echi jaré chati oluwáwami, mapurigá echi mukí wabé simírami chati oláami níli. <sup>5</sup>A'lí echo'ná echi chati sitíi oláami mukí kowálachi bilé riwá osirúami níli, mapu ketasi galá machirúami ju. Je'ná jerigá osirúami níli: Je'ná mukí, Babilonia riwéami, ne si'néami echi jaré chati sitíi oláami muguú iyela niráa ju, ayénachó iyela ju si'néami echi jaré pagótami kanápuromí piréami mapu ikí chokoba jaga o'wiké echi jaré amachíkalawami namuti. <sup>6</sup>Echalini riwali mapurigá echi mukí rikulí niráa níli mapujiti binói ma olali mapurigá wikabé pagótami wabé léntaga ko'wirúami níma, mapujiti aboni galá nawésali jeanigá mapu aboni galá bichíyami níli Jesucristo niráa. Echijiti echi mukí mapurigá rikulí niráa níli aboni lalá jiti. A'lí mapalini je'ná jerigá riwali, echalini ne wabé majali. <sup>7</sup>A'lí echi walula Riosi kapitánawala tamí jeanigá rukueli:

¿Churékulami echiyena majawá? Nijeni mi ruyema suwaba mapu churigá aniwáami ju echi mapu ketasi cho machirúami ju echi mukí jiti, ayénachó echi wabé aparúami sitákami namuti jiti, echi mapu echi mukí asigá atí, echi mapu kichao mo'wéami ju, ayénachó mapu makói awéami ju. <sup>8</sup>Ayénachó echi walula Riosi kapitánawala tamí jeaneli: Echi wabé aparúami sitákami namuti mápumi riwalí échiko chabénala bitéali jena'í wichimóbachi mapurigá rijói niráa, chopi jipi ma ketasi te, chopi pe minana échiko moka ku machinama echo'ná wabé ri'lé jochi jonsa mapo'ná ketasi suwíbami ju ri'lena; ayénachó échiko pe minana auchecho siné galá waminá mukumea. A'lí jena'í wichimóbachi piréami pagótami, si'néami mapu ikí aboni riwalá ketasi osirúami ju echo'ná Riosi oselíwalachi mapo'ná ki'yá chokichí jonsa Riosi osali echi jaré pagótami riwalá mapu sinibí niráa piréami níima, abóniko ne wabé majáratami níima mapalí aboni riwimea echi wabé aparúami sitákami namuti, echi mapu chabénala bitéali jena'í wichimóbachi, mapurigá rijói niráa, echi mapu ketasi te jipi rawé, echi mapu pe waminánomí auchecho ku bitélama.

<sup>9</sup>Echi jaré pagótami mapu galá machíami juko, abóniko chopi omero machiyá je'ná jeyiri: Echi kichao mo'ó, kicháona chulichí ju, echo'ná walúlachi nirúami, mapo'ná echi mukí atí, walula nuláami niráa. <sup>10</sup>Ayénachó echi kichao mo'ó kichao o'wéala silíami ju, chopi malí echi o'wéala silíami ma omérata níili, auché bilé jipi abijí walubela silíami ju, chopi auché bilé ketasi cho nawali. A'lí mapalí échiko nawasa, arigá 'wéali níima mapu pe téeli niráa walula silíami níima. <sup>11</sup>A'lí echi wabé aparúami sitákami namuti mapu chabénala bitéali mapurigá rijói niráa, echi mapu jipi ketasi te, échiko níima echi osánaósa walula silíami, ayénachó échiko bilé níili echi auché jaré kichao. A'lí échiko pe waminana suwaba mukusá, ma echo'ná yénabisí níima.

<sup>12</sup>A'lí echi jaré makói awá mápumi riwali, ibili niráa o'wéala silíami ju, chopi aboni ketasi cho jawárami ju mapurigá o'wéala silíami niráa. Pe waminana abóniko pe téeli niráa jawárami níima mapurigá aboni o'wéala silíami níima, mapuyenasí echi wabé aparúami sitákami namuti ne walubela silíami níima. <sup>13</sup>A'lí je'ná makói o'wéala silíami a'nawí chópirigá 'natama mapurigá aboni chopi nijéwaga ku'wírama echi wabé aparúami sitákami namuti, suwaba mapu ikí binói nakimea olánala. <sup>14</sup>A'lí echi makói o'wéala silíami nakoma echi Méchuli sayéraga, chopi echi Méchuli galá omérama aboni, mapujiti Binói ne Walubela ju si'néami ju si'néami echi auché jaré o'wéala yuwa, ayénachó ne Walubela Silíami ju si'néami echi auché jaré silíami yuwa. A'lí echi jaré mapu echi Méchuli yuwa muchuwi galá bayérami níili mapurigá aboni najátama Binói yuwa, ayénachó aboni chapirúami níili Riosi jiti, a'lí aboni galá bichíyami ju.

<sup>15</sup>Echalí echi walula Riosi kapitánawala ayénachó tamí jeaneli: Mujemi riwali echi chati oláami walula mukí echo'ná wikanáami o'weli ba'wírali moba atíami. Suwaba je'ná jerigá aniwáami ju: Echi mukí echirigá ne walula nuláami níima wikanáami piréami pagótami yuwa, ayénachó ne wikabé isena pagótami yuwa, ayénachó wikabé o'wéala silíami yuwa, ayénachó wikabé si'wináriga ra'íchami pagótami yuwa. <sup>16</sup>A'lí echi makói awá mápumi riwali, echi wabé aparúami sitákami namuti awala, echi mapu o'wéala silíami ju, abóniko ne wabé kichima echi chati oláami walula mukí, ayénachó waminá waná bi'neli ariwema, machí sapéami niráa. A'lí abóniko suwaba waminá suwábama echi chati oláami walula mukí, ayénachó abóniko suwaba ikósama. <sup>17</sup>Mapujiti Riosi Binói nakíili mapurigá aboni

echirigá kastigo 'yama echi chati oláami walula mukí, ayénachó mapurigá aboni a'nawí chópirigá 'natama mapurigá aboni chopi nijéwama echi wabé aparúami sitákami namuti mapuyénasí suwaba ikimea mapurigá Riosi bichíwaga anili mapu echirigá ikimea riwéali. <sup>18</sup> A'lí echi walula mukí mápumi riwali, échiko echi walubé walúlachi ju. A'lí echo'ná walúlachi piréami o'wéala arigá nuléami ju ne si'néami echi auché jaré o'wéala silfami jena'í wichimóbachi nuláami.

### Babilóniachi anilíwachi walúlachi suwábarami níima

**18** Pe wilibeko, je'ná jerigá ma ikisáa, nijeni riwali auchecho bilé Riosi kapitánawala ripá riwigachi jonsa rikínami. Échiko ne wabé walubela níli. A'lí échiko ne wabé ratábami níli; echijiti ne buchuwímana jena'í wichimóbachi ne wabé simírami machiná níli. <sup>2</sup> Echalí echi walubela Riosi kapitánawala o'weli ra'íchaga jeanili: Ma galá suwábarami níima echi walubé walúlachi Babilóniachi anilíwachi. Jipi jonsa echi pagótami ma ketasi pirélama echo'ná, chopi pirélama echi jaré chati sitíí oláami riablo aliwala, ayénachó suwaba chibi yiri chati sitíí oláami aliwá, ayénachó suwaba chibi yiri o'weli i'nika 'yéami mapu wabé sitíí chijúntami ju. <sup>3</sup> Ne si'néami chubiyiri pagótami suníami jena'í wichimóbachi piréami mapurigá tékuli niráa 'yena, mapujiti aboni achigórigá wabé chati sitíí olali mapurigá echo'ná Babilóniachi piréami olali, ayénachó echi auché jaré o'wéala jena'í wichimóbachi piréami achigórigá chati olali mapurigá echo'ná Babilóniachi piréami o'wéala chati sitíí olali. A'lí echi jaré wiká namuti ralinéwami jena'í wichimóbachi piréami ma simírami wikabé meli wenomí mapujiti echo'ná Babilóniachi piréami pagótami wikabé namuti ralali, suwaba mapu ikí aboni nakili ralinália mapurigá wabé kaníliga pirélama.

<sup>4</sup> Echalí nijeni námali mapalí Riosi Binói echo'ná ripá riwigachi jonsa ra'íchaga jeanili: Echo'ná walúlachi jonsa waminá simasi si'néami 'yemi máputamo Nijé níwala pagótami ju, mapurigátamo ketasi achigórigá chati sitíí oláami níibo mapurigá echo'ná piréami, ayénachó mapurigátamo ketasi achigórigá ne wabé risúu oláami níibo mapurigá echo'ná piréami wabé risúu olárami níima mapalí aboni kastigo 'yárami níima. <sup>5</sup> Mapujiti echo'ná Babilóniachi piréami pagótami ne simírami wisabé wabé chati sitíí olali, mapuyénasí Riosi mayé mapu aboni ne sébali chati sitíí olali, ayénachó Riosi we 'nata mapurigá aboni wabé chati sitíí olali. <sup>6</sup> Galá níima mapu echo'ná Babilóniachi piréami pagótami achigórigá risúu olárami níima mapurigá aboni risúu olali auché jaré pagótami, ayénachó galá níima mapu aboni waminabi ne wabé simírami, osá chokéami niráa, risúu olárami níima. Galá níima mapu aboni 'yárami níima bajínala echi mukuwáwami waminabi simírami osá chokéami wabé chati niráa, ketasi mapurigá aboni 'yali bajínala echi auché jaré pagótami. <sup>7</sup> Galá níima mapu echo'ná Babilóniachi piréami pagótami echiyena ne wabé simírami risúu olárami níima, ayénachó mapurigá aboni echiyena ne wabé simírami risúu nílama, achigórigá mapurigá aboni ne wabé simírami nóchami níli, ayénachó mapurigá aboni ne wabé simírami kaníliga olali suwaba mapu ikí aboni nakili olánala. Abóniko je'ná jerigá aní: Tamujé walúlawalachi ne wabé walubela ju. Ketásita waminá waná awínala ariwérami ju, nibilé sineta risúu nílabo. <sup>8</sup> Ayénachó echijiti waminánomí echo'ná Babilóniachi piréami pagótami sinepi rawé niráa walú kastigo 'yárami níima, mapujiti jaré aboni ko'wirúami níima, auché jaré wabé simírami risúu olárami níima, auché jaré ne wabé simírami 'lochébanatarami



níima, ayénachó aboni walúlawalachi waminá suwaba ikósarami níima, mapujiti echi Walubela Riosi ne wabé omériami ju mapu nulali echirigá kastigo 'yánala.

<sup>9</sup>A'lí si'néami echi jaré o'wéala silíami jena'í wichimóbachi piréami mapu achigórogá chati sitíi ologá piréali mapurigá echo'ná Babilóniachi piréami olali, echi jaré mapu wabé kaníliga olali suwaba mapu ikí echo'ná piréami olali, abóniko ne wabé nalákama, ayénachó aboni ne wabé risúu animea mapalí aboni ritiwá walubé molínachi mapalí echi walubé walúlachi suwaba rajínama. <sup>10</sup>Echalí mapalí echo'ná Babilóniachi piréami pagótami echiyena walubé kastigo 'yárami níima si'néami echi auché jaré o'wéala ne wabé majaga, mikabé jaga, jeanimea: ¡Baji, 'yemi pagótami echo'ná walubé walúlachi Babilóniachi anilíwachi piréami, 'yemi máputamo ne wabé nuléami níili auché jaré pagótami! Jípitamo sinépi niráa suwaba kastigo 'yárami ju.

<sup>11</sup>Echalí echi jaré wiká namuti ralinéwami jena'í wichimóbachi piréami ne wabé nalákaka, wabé risúu animea mapujiti echo'ná walúlachi suwaba suwábarami níima, mapujiti echalí ma ke nirúlama pagótami mapu ralimea echi wikabé namuti mapu echi ralinéwami ralinéabiya pama. <sup>12</sup>Mapujiti echo'ná Babilóniachi piréami wabé raláami níili echi oro, echi plata ayénachó, echi wabé natéami rité ayénachó, echi perla anilíwami ayénachó. Echo'ná piréami wabé raláami níili echi napoli wabé galabéala, echi chiní saláami ayénachó, chiní chomítuwami ayénachó, chiní sitákami asíchiko. Echo'ná piréami ayénachó wabé raláami níili su'weti júkami tabla ayénachó, auché jaré karúmati marfil anilíwami ayénachó, auché jaré tabla wabé natéami ayénachó, echi jiero lánami ayénachó, echi jiero ayénachó, echi rité rikóchali wabé ba'yóami ayénachó. <sup>13</sup>Echo'ná Babilóniachi piréami ayénachó we raláami níili echi kanela anilíwami kajela, echi jaré wabé su'weti júkami raká ayénachó, echi galabé moluwá ayénachó, echi wabé su'weti mira anilíwami ayénachó, auché jaré wabé su'weti júkami namuti ayénachó, echi uva ba'wila ayénachó, echi galabé aceite ayénachó, echi wabé galabé arina ayénachó, echi turío ayénachó, echi jaré namuti muruka uchékowami ayénachó, echi jaré bo'wá ayénachó, echi jaré kawé ayénachó, echi jaré karro anilíwami kaweti banírawami ayénachó, echi jaré pióntami ayénachó. A'lí aboni arigá raláami níili echi jaré pagótami aliwala ayénachó. <sup>14</sup>Ayénachó echi jaré wiká namuti ralinéwami jeanema echo'ná Babilóniachi piréami pagótami jeanigá: ¡Baji, 'yémitamo ma ketasi níwa echi jaré wikabé karúmati namuti wabé natéami máputamo ne wabé koruli! Jipi, mátamo wikáwali suwaba echi jaré galabéala namuti máputamo níwali, a'lí bichétamo ke siné auchecho riwiboa.

<sup>15</sup>Echalí echi jaré rijói je'ná jeyiri karúmati namuti ralinéwami, echi jaré mapu ne wabé níwami nílali mapujiti echo'ná Babilóniachi piréami wabé ralali aboni níwala namuti, abóniko mikabé jaga. ne wabé majaga riwimea mapurigá echo'ná Babilóniachi piréami echirigá ne wabé risúu olárami níima, ayénachó aboni ne wabé nalákaka, risúu animea <sup>16</sup>jeanigá: ¡Baji, ne wabé simírami risúu olárami ju echo'ná Babilóniachi piréami pagótami! Abóniko ne wabé níwami níili mapurigá bilé mukí ne wabé simati napáchami, ne wabé ba'yóami chomítuwami sipúchami, sitákami ayénachó, echi mapu ayénachó wabé ba'yóratami ju echi oro jiti, jaré wabé ba'yóami rité jiti ayénachó, echi jaré perla anilíwami jiti ayénachó; <sup>17</sup>¡chopi jipi, sinépi niráa, suwaba aboni níwala wabé galabéala karúmati ma suwaba suwábarami ju!

Echalí si'néami echi jaré rijói barko simíríami ne wabé majaga mikabé jábama, echi auché jaré pagótami echo'ná bárkochi muchiga 'yénamei ayénachó, echi auché jaré bárkochi nóchami ayénachó, si'néami rijói echo'ná moba walubé ba'wírali nóchami ayénachó. <sup>18</sup> A'lí ma riwisáa echi walubé walúlachi walú rajínaga molínachi, echalí si'néami aboni o'weli ra'íchaga jeanimea: ¡Ke siné nirúali auché biléana echiyena galabé walúlachi!

<sup>19</sup> Ayénachó ne wabé o'mónami niráa aboni pásama wi'yé echo'ná aboni mo'ólachi, ayénachó ne wabé nalákaka, risúu anigá, o'weli ra'íchaga jeanimea: ¡Baji, ne wabé risúu olárami ju echo'ná Babilóniachi anilíwachi walúlachi piréami pagótami! Aboni ne wabé simíríami níwami níili, echijiti si'néami echi jaré rijói mapu ikí níwa echi o'weli barko, echo'ná walubé ba'wírali moba 'yénamei, si'néami we nóchaga, echi wikabé namuti echo'ná walúlachi toyá, ayénachó we níwami níili. ¡Chopi jipi echo'ná walúlachi piréami sinepi niráa waminá suwábarami ju!

<sup>20</sup> Ne wabé kanílasi si'néami 'yemi pagótami echo'ná ripá riwigachi muchúami mapujiti Riosi echirigá walú kastigo 'yama echo'ná Babilóniachi piréami pagótami, ayénachó echijiti kanílasi 'yemi o'wéala máputamo ki'yá chokichí julárami níili nawisánala Jesucristo jiti rugá, ayénachó echijiti kanílasi si'néami 'yemi máputamo wakinana julárami níili Riosi jiti nawisánala, ayénachó kanílasi ne si'néami 'yemi máputamo Riosi níwala pagótami ju, mapujiti mapalí Riosi echirigá risúu olama echo'ná Babilóniachi piréami pagótami, echalí Riosi echirigá 'yama walú kastigo mapujiti echo'ná piréami ma wisabé niráa 'yemi mi wabé risúu olali.

<sup>21</sup> Echalí bilé wabé jiwérami walubela Riosi kapitánawala chapigá mutuka bilé walubé rité mapuyiri bilé wabé walubé matá, echo'ná walubé ba'wírali ri'lé pali jeanigá: Achigórigá waminá ri'lé a'wátami níima echo'ná Babilóniachi piréami pagótami, a'lí aboni ke siné auché riwirúami níima. <sup>22</sup> A'lí echo'ná walúlachi ma ke siné auché námami níima echi jaré tákawami namuti, arpa anilíwami; nibilé cho námami níima echi kusela, nibilé cho námami níima echi auché jaré korneta anilíwami, mapujiti echo'ná ma ke pirélama pagótami. A'lí ke wesi waminá nochama echo'ná walúlachi, mapuyíripi nóchali; nibilé waminabi batuka nochama echi jaré muguí, mapujiti ke wesi waminabi pirélama echo'ná. <sup>23</sup> Jipi jonsa ke wesi pagótami waminabi pirélama echo'ná Babilóniachi, echijiti ma ketasi auché rajamea echi chopé echo'ná, nibilé wesi auchecho siné kaníliga omowama echo'ná, mapurigá echi pagótami olá mapalí jaré we niwí. Chabénala echo'ná Babilóniachi piréami we ralinéwami níili waminabi wabé wikabé namuti, ketasi mapurigá echi auché jaré ralinéwami kanápuromí jena'í wichimóbachi piréami, ayénachó echo'ná piréami we sipabúami níili; echijiti aboni ma ne wabé 'yékali suníami jena'í wichimóbachi piréami pagótami, chopi jipi jonsa ke wesi waminabi pirélama echo'ná.

<sup>24</sup> Echo'ná Babilóniachi piréami pagótami ko'yáami níili si'néami echi jaré mapu Riosi júuli nawisánala, ayénachó ko'yáami níili si'néami echi auché jaré Riosi níwala pagótami, si'néami mapu ikí ko'wirúami níili jena'í wichimóbachi, ki'yá chokichí jonsa.

**19** Pe wilibeko, je'ná jerigá ma ikisáa, nijeni námali wikabé pagótami o'weli ra'ícháchanáchi echo'ná ripá riwigachi muchúami, echi jaré mapu jeanili: ¡Aleluya! ¡Riosi ne wabé Walubela ju! Mapujiti Binói ku wikawa si'néami mapu ikí galá bichíi.

Ayénachó Binói ne wabé Walubela ju, ne wabé omériami ayénachó, mapujiti tamujé Riósawala ju.

<sup>2</sup> Mapujiti Riosi ne wachínaga olá justicia, ne wabé bichíwali niráa.

Echijiti Riosi ma walú kastigo 'yali echi walula mukí chati sitíí oláami, echi mapu wabé chati sitíí olálali jena'í wichimóbachi piréami, mapujiti binói ne wabé simírami chati sitíí oláami níli;

chopi Riosi ma ne wabé risúu olali echi mukí mapujiti échiko ma ko'yali wikabé pagótami mapu galá bichíyami níli Riosi.

<sup>3</sup> Echálí echi wikabé pagótami auchecho jeanili: ¡Aleluya, waminabi walubéraga anérami nílaga Riosi! mapujiti echi walula mukí, chati sitíí oláami, ne sinibí niráa wabé risúu olárami níima echo'ná ri'lé walubé na'írali!

<sup>4</sup> Echálí echi jaré osá makói miná naó o'wéala ochérami, ayénachó echi jaré naó akami namuti, si'néami chokoba jaga, ri'lé wichí akaná uchúpali, echo'ná bacháami mapo'ná Riosi asali echo'ná walubela asíbalachi; ayénachó ne si'néami waminabi walubéraga aneli Riosi, ayénachó jeanili: ¡Echirigá níima! ¡Aleluya!

<sup>5</sup> Echálí echo'ná echi Walubela Riosi asíbalachi jonsa námami níli ra'icháchanáchi jeanigá:

Waminabi walubéraga anesi Riosi si'néami 'yemi pagótami mapu ikítamo bichíyami ju Riosi, si'néami 'yemi mapu ikítamo majawá Riosi.

Echirigá waminabi walubéraga anesi Riosi si'néami 'yemi kuchípara, ayénachó si'néami 'yemi o'wéala.

#### Walubé omowama mapalí echi Méchuli ma niwima

<sup>6</sup> Echálí nijeni ayénachó námali ra'icháchanáchi mapurigá wikabé pagótami o'weli ra'íchami niráa. Ne wabé o'weli anéchanami níli mapurigá wikanáami bakochi niráa, ayénachó mapurigá wikabé wabé iwéami ri'óami niráa. Echálí si'néami echi wikabé pagótami je'ná jerigá anili:

¡Aleluya, waminabi walubéraga anérami níraga Riosi! Mapujiti echi

Walubela tamujé Riósawala ma chótali nulayá mapurigá ne wabé

Simírami Walubela niráa, jena'í wichimóbachi.

¡Échiko tamujé Riósawala ju, ne suwaba omériami!

<sup>7</sup> Galá níima máputa ne wabé kaníliga kachiboa,

ayénachó máputa ne wabé simírami kanílabo,

ayénachó máputa waminabi walubéraga anebo echi Walubela Riosi,

mapujiti ma sébali mapalí echi Walubela Jesucristo niwima,

mapujiti Échiko Riosi níwala Méchuli ju.

A'lí tamujé máputa Binói upila níbo mata galá kariweli, mapujiti ne si'néami tamujé máputa ku wikawárami juko,

ne si'néamita napawíkami niráa mapurigá Binói upila niráa níbo.

<sup>8</sup> A'lí si'néami mapu ikita Riosi níwala ju, mapujítita ma ku wikawárami níli,

tamujeta ma 'yárami níli mapurigata bukulíwami galabé rosákami niráa

napachabo, mapuyiri napoli.

A'lí tamujeta echirigá 'yárami níli mapurigata galabé wachínaga ologá pirélabo jena'í wichimóbachi. A'lí ne si'néamita ne napawíkami niráa, mapurigá echi Méchuli upila níbo.

<sup>9</sup> Echálí echi walubela Riosi kapitánawala tamí jeaneli: Mujé je'ná jerigá osá: Galá níima mapu ne wabé kanílama si'néami echi jaré mapu ikí bayérami níliiko mapu ko'mea mapalí echi Méchuli wabé kaníliga omáwaga niwima.

Ayénochó tamí jeaneli: Riosi Binói je'ná jerigá ne bichíwaga anili. <sup>10</sup>Echalí nijeni we yáati chokoba wilfbali echo'ná bacháami mapo'ná echi walubela Riosi kapitánawala wilili, mapurigani o'wikema binói, chopi echi walubela Riosi kapitánawala tamí jeaneli: Ketasi tamí o'wiké echirigá, mapujiti nijeni bilé pioni ju, Riosi piónawala niráa, achigórigá mapurigá mujé niráa, ayénachó mapurigá echi auché jaré mujé ritémawala niráa. ¡Chopi echirigá walubéraga ané echi bilepi Walubela Riosi!

A'lí si'néami mapu ikí ne bichíwali Riosi jiti julárami níli nawisánala, abóniko galá nawesa Jesucristo jiti rugá.

### Echi kawé rosákami aséami

<sup>11</sup>Echalí nijeni riwali mapurigá echo'ná ripá riwigachi iráparami niráa níli. A'lí echo'ná jonsa machínali bilé kawé rosákami. A'lí echi kawé aséami je'ná jerigá riwéami níli: Echi ne Bichíwaga Oláami, ayénachó je'ná jerigá riwéami níli: Echi ne Bichíwaga Ra'íchami, mapujiti Binói tamujé tamí ne wabé wachínaga nulé, ayénachó Binói we níkwika sayera echi auché jaré we chati sitíi oláami. <sup>12</sup>A'lí Binói busila ne wabé ratábami níli mapurigá na'í niráa, ayénachó wikabé oro niwárami koyéami níli echo'ná Binói mo'ólachi, ayénachó echo'ná Binóichi osirúami níli bilé riwá mapu Binói chopi galá machili mapu chu aniwáami ju. <sup>13</sup>Binói napáchami níli bilé wi'libé napacha, la jiti yogárami, a'lí Binói je'ná jerigá riwéami ju: Riosi Ra'íchala. <sup>14</sup>Ayénochó Binói yuwa najátali si'néami echi jaré wikabé pagótami ripá riwigachi muchúami. A'lí si'néami aboni bukúlwami, galabé tosákami napáchami níli, mapuyiri napoli. Ayénachó si'néami aboni aséami níli kawé tosákami. <sup>15</sup>A'lí echo'ná Binói chumilachi jonsa machínali mapuyiri bilé wi'lí ripiyá, wabé oláami, mapurigá echijiti chi'wanama echi wikabé chati sitíi oláami pagótami jena'í wichimóbachi tibíami. A'lí Binói ne wabé jiwériga nulema echi pagótami mapurigá Walubela niráa. A'lí mapalí Binói kastigo 'yama, echalí Binói wabé omériga olama mapurigá bilé rijói mapu echi wikabé uva rakala moba rimisoka echirigá machí pa echi uva ba'wila. Echalí Binói echirigá nulama mapu echi chati sitíi oláami pagótami walubé kastigo 'yárami níma, mapujiti echi Suwaba Omérami Riosi ne wabé yona mapujiti aboni ketasi si'nú bukúlwami ku 'nata, nibilé cho ariwé chati sitíi olayá. <sup>16</sup>A'lí echo'ná Binói wi'lí napáchalachi, echo'ná moba Binói kasílachi osirúami níli je'ná riwá: Je'ná ju echi Ne Walubela Silíami, si'néami echi auché jaré o'wéala silíami Silínawala. Ayénachó je'ná riwá echo'ná osirúami níli: Je'ná ju Ne Walubela, si'néami echi auché jaré o'wéala Walubélawala.

<sup>17</sup>Pe wilibeko nijeni riwali bilé walubela Riosi kapitánawala mapu echo'ná rayénachi wilili, echi mapu o'weli ra'íchaga bayeli suwaba echi jaré wilú mapu ikí ripá 'nika 'yena jeanigá: Wakiná simasi, ma napawisi ma kopoa echi mapu Riosi 'yemi mi 'yama máputamo kopoa. <sup>18</sup>'Yémitamo ma kopoa wikabé o'wéala silíami sapala, ayénachótamo kopoa wikabé o'wéala sontarsi sapala, wikabé jobátami rijói sapala ayénachó, echi wikabé kawé sapala ayénachó, echi kawé aséami sapala ayénachó. Mátamo kopoa si'néami pagótami sapala mapuyíripi tibí jena'í wichimóbachi. 'Yémitamo ma kopoa echi nuláami rijói sapala, ayénachótamo kopoa echi jaré pióntami sapala. Mátamo kopoa echi jaré kuchípala sapala, ayénachótamo kopoa echi jaré o'wéala sapala.

<sup>19</sup>Echalí nijeni riwali echi bacháwala wabé aparúami namuti, ne si'néami echi jaré o'wéala silíami jena'í wichimóbachi nuláami ayénachó, ne si'néami

aboni sontársawala ayénachó, si'néami mapu ikí ma nakóbiya napawili echi Walubela sayéraga mapu aseli echi kawé rosákami, Binói pagótamawala sayériya ayénachó. <sup>20</sup> A'lí echi bacháwala wabé aparúami namuti chapigá bulirúami níli, echi wabé 'yékaka nawésami rijói ayénachó, echi mapu chabénala niráa wabé omériga olali bacháami echi bacháwala wabé aparúami namuti yuwa mapurigá ke wesi auché jaré pagótami omero olayá. A'lí echirigá ologá echi wabé 'yékaka nawésami rijói ne wabé 'yékali echi jaré pagótami mapu arigá ariweli mapurigá aboni bawirárami níima mapurigá echi osáwala wabé aparúami namuti nuleli, echi jaré aboni mapu ayénachó bacháami chokoba jaga amachíkali echi walubé amachíkalawami namuti mapu niwárami níli mapuyiri echi bacháwala wabé aparúami namuti. A'lí echalí echi wabé 'yékaka nawésami rijói napawika echi wabé aparúami namuti yuwa, okuánika akami niráa a'wátami níli echo'ná ri'lé riáblochi walubé na'írali mapo'ná ayénachó we rajá echi asújiri anilfwami. <sup>21</sup> A'lí echi jaré wikabé aboni níwala pagótami waminá ko'wirúami níli echi wi'lí ripiyá jiti mapu machínali echo'ná echi Walubela chumilachi jonsa, echi mapu aséami níli echi kawé rosákami. A'lí suwaba echi wikabé wilú ne o'weli posali, aboni sapala ko'yá.

#### Bilé mili bamíbbali mapalí Jesucristo ne Walubela níima jena'í wichimóbachi

**20** Pe wilibeko nijeni riwali bilé walubela Riosi kapitánawala ripá riwigachi jonsa rikínami, echi mapu kami níli echi irápala, echo'ná wabé ri'lé jochi irápawami, mapo'ná ketasi suwíbami ju ri'lena. Ayénachó kami níli bilé walubé jiero wiya. <sup>2</sup> Echalí echi walubela Riosi kapitánawala chapili echi wabé aparúami riablo. Échiko mapuyiri bilé sayawi ju, ki'yá jonsa nirúami, echi mapu Satanasi riwé. A'lí echi walubela Riosi kapitánawala waminá bulali echi riablo mapurigá echirigá tibima bilé mili bamíbbami yénasí. <sup>3</sup> Ayénachó echi Riosi kapitánawala waminá wabé ri'lé jochi pali echi riablo mapo'ná ketasi suwíbami ju ri'lena, a'lí echo'ná ne wabé iwéami 'yérali mapurigá ke machínama, mapurigá echi riablo ketasi waminabi 'yékama jena'í wichimóbachi piréami pagótami, bilé mili bamíbbali yénasí. Chopi ma simírasa bilé mili bamíbbali, arigá 'wérali ju mapu echi riablo ku botonárami níima, pe téeli niráa.

<sup>4</sup> Echalí nijeni riwali wikabé o'wéala muchíbalachi, ayénachóni riwali echo'ná muchúami echi jaré mapu nulérami níli justicia olánala si'néami echi jaré pagótami mapu ikí ke bichíyami níli. Ayénachóni riwali echi jaré galá bichíyami pagótami aliwala, si'néami mapu ikí kutachí ripúnaga ko'wirúami níli ki'yá chokichí jonsa, mapujiti aboni nawésami níli Jesucristo jiti rugá, ayénachó mapujiti aboni bichíili Riosi Ra'íchala. Ke wesi aboni chokoba jaga walubéraga aneli echi bacháwala wabé aparúami namuti; nibilé cho ariweli mapurigá aboni bawirárami níima echo'ná aboni kowálachi, nibilé echo'ná aboni sikálachi, mapurigá echi osáwala wabé aparúami namuti nuleli. Nijeni riwali mapurigá je'ná jaré auchecho siné ku pirélama jena'í wichimóbachi waminánomí, ayénachó mapurigá aboni pe o'wéala níima Jesucristo yuwa bilé mili bamíbbali yénasí, mapurigá aboni pe kuchípala nuláami níima, mapurigá aboni ku'wírama Jesucristo mapalí Binói ne Wabé Walubela níima jena'í wichimóbachi. <sup>5</sup> Echalí níima echi ne bachá ku owínawachi rawé, chopi echi auché jaré suwíami ketasi cho abijí ku pirélama, chopi waminánomí auchecho ku pirélama mapalí ma simírasa echi

bilé mili bamíwali. <sup>6</sup> Ne wabé kaníliami níima echi jaré mapu ikí ku o'wínama echalí ne bachá ku owínawachi rawé! Abóniko chopi galabé oláami ju mapurigá Riosi nakí. A'lí aboni ketásirapé auché osá suwimea, chopi aboni Riosi níwala sacerdote níima, Jesucristo níwala ayénachó. A'lí aboni pe kuchípala nuláami níima mapurigá aboni ku'wílama Jesucristo mapalí Binói ne Walubela níima jena'í wichimóbachi bilé mili bamíwali iyénasí.

<sup>7</sup> Chopi ma simírasa echi bilé mili bamíwali, echalí echi Satanasi riwéami riablo ku botánaga, waminá ku ni'yúbanarami níima. <sup>8</sup> Echalí binói ne wabé yoga ku machínsa, ne wabé nakimea 'yékanala ne suníami jena'í wichimóbachi piréami pagótami. Echalí binói ku machínsa 'yéka echi Goga riwéami walubela silíami, ne si'néami echi pagótami ayénachó, echo'ná Goga kawíwalachi piréami. Echalí echi Satanasi napabuma ne si'néami aboni mapurigá nakoma, a'lí ne wabé simírami wikabé níima mapurigá echi saté echo'ná walubé ba'wírali suwé nirúami. <sup>9</sup> Echalí aboni nolínama ne suníami jena'í wichimóbachi jonsa, a'lí noligá napawima echo'ná Jerusalémachi anilíwachi walúlachi mapo'ná muchima Riosi níwala pagótami, chopi echo'ná ripá riwigachi jonsa Riosi julama walú na'í mapurigá si'néami aboni suwaba ikósaga suwábarami níima. <sup>10</sup> Echalí echi riablo mapu ne wabé 'yékali echi pagótami, échiko waminá ri'lé walubé na'írali pátami níima, mapo'ná ayénachó we rajá echi asújiri anilíwami, mapo'ná chabénala a'wátami níili echi wabé aparúami namuti, echi wabé 'yékami nawésami ríjoi yuwa. Echo'ná aboni ne wabé simírami risúu olárami níima ne sinibí rawé, ne sinibí rokogó, sinibí niráa, ne sinibí.

**Riosi justicia olama mapalí si'néami echi jaré chati sitíi oláami pagótami  
bacháami jábama echo'ná Riosi níwala rosákami walubela asíbalachi**

<sup>11</sup> Echalí nijeni riwali bilé rosákami walubela asíbalachi, ayénachóni riwali Echi mapu echo'ná asali. Échiko ne wabé simírami Walubela ju, echijiti bacháami jonsa mapo'ná Binói atí, je'ná kawí suwaba waminá ke 'ne ikimea, echo'ná ripá mapo'ná siyona ayénachó. A'lí ma ketasi nirúlama. <sup>12</sup> Ayénachóni riwali si'néami echi jaré suwíami, echi jaré mapu o'wéala niráa níili, ayénachó echi jaré mapu kuchípala níili. Echalí nijeni riwali mapurigá ne si'néami echo'ná bacháami Riosi yuwa jábama. Echalí echi jaré oselí irápaga 'nérami níima. Ayénachó echi auché bilé oselí irápaga 'nérami níima, echi oselí mapo'ná osirúami ju si'néami riwalá mapu ikí sinibí niráa pirélama Riosi yuwa. Echalí echi jaré suwíami justicia olárami níima mapurigá aboni ologá piréali, mapurigá osirúami níili echo'ná echi jaré oselichi. <sup>13</sup> Echalí nijeni riwali mapurigá ne si'néami echi jaré suwíami mapu ikí waminá ri'lé butuwíkami níili echo'ná walubé ba'wírali auchecho ku párami níima, ayénachó ne si'néami echi auché jaré mapu ikí suwíami ju auchecho ku párami níima echo'ná jonsa mapo'ná echi jaré suwíami aliwala muchuwi. Echalí ne si'néami echi jaré suwíami justicia olárami níima, a'lí ibili niráa kastigo 'yárami níima achigórigá mapurigá ibili chati sitíi olali. <sup>14</sup> Echalí echi mukuwáami waminá ri'lé walubé na'írali pátami níima, ayénachó echo'ná a'wátami níima ne si'néami echi jaré suwíami mapu ikí ketasi ku wikawárami níili. A'lí echalí mapalí aboni echo'ná ri'lé walubé na'írali a'wátami níima, echalí níima mapalí aboni osá niráa suwimea. <sup>15</sup> A'lí echo'ná a'wátami níima si'néami echi jaré mapu ikí aboni riwalá ketasi osirúami níili echo'ná oselichi mapo'ná osirúami ju si'néami echi jaré pagótami riwalá mapu ikí sinibí niráa pirélama Riosi yuwa.



**Ripá riwigachi auché si'nú bukulíwami, ayénachó auché si'nú kawí ne bukulíwami**

**21** Echali nijeni riwali mapurigá ripá nolírali mapo'ná siyona auché si'nú bukulíwami nílama, ayénachóni riwali mapurigá auché si'nú kawí ne bukulíwami nílama, mapujiti ripá nolírali mapo'ná siyona mapu tamujeta ritiwá waminá ke 'newa ikimea, ayénachó je'ná kawí mapo'nata piré waminá ke 'newa ikimea. A'lí echi walubé ba'wí ma ke nirúlama. <sup>2</sup>Nijé, Juani, riwali mapurigá echi wabé galabé walúlachi rikínama echo'ná ripá riwigachi jonsa, mapo'ná Riosi atí. Echo'ná echi bukulíwami Jerusalémachi anilíwami níima. Suwaba ne galá ba'yóraga a'láratami níima mapurigá bilé tiwé ba'yóraga a'lara, binói niráa, mapalí ma niwima echi yuwa mapu binói kunala níima. <sup>3</sup>Ayénachóni námali mapurigá waminánomí bilé o'weli ra'ichami echo'ná ripá riwigachi jonsa jeanigá: Nibira, jipi Riosi bité nasípomí echi jaré pagótami yuwa. Jipi jonsa Riosi bitélama aboni yuwa. A'lí aboni Riosi níwala pagótami níima. A'lí Binói Riosi aboni yuwa asimea. Sinibí niráa aboni Riósawala níima. <sup>4</sup>Ayénachóni námali mapurigá waminánomí jeanimea: Riosi galá ku kanílatama aboni, mapurigá ma ketasi o'móniga nalákama. Echali jonsa echi pagótami ma ketasi suwimea, nibilé auché nalákama, nibilé auché risúu animea, nibilé auché okoma; mapujiti suwaba mapu ikí chabénala nirúaliko, ma suwaba simárali.

<sup>5</sup>Echali nijeni námali ra'icháchanachi echi Walubela Jesucristo, echo'ná walubela asíbalachi atíami, echi mapu tamí jeaneli: Nibira, Nijeni bukulíwami niwáma suwaba namuti. Ayénachó tamí jeaneli: Oselichi osá suwaba je'ná ra'ichali, mapujiti ne bichíwali ju. Echijiti galá níima mapu ne si'néami pagótami galá bichíima ne suwaba.

<sup>6</sup>Ayénachó tamí jeaneli. Suwaba ma olárami ju. Nijeni ne bachá ju mapurigá echi binékowami “A” anilíwami ne bachá ju, ayénachóni ne jubá níima mapurigá echi binékowami “Z” anilíwami ne jubá ju. Nijeni 'yama mapurigá ne si'néami echi jaré pagótami mapu ikí balámako, ketasi biyiri natétaga galá bajima echo'ná bajichi mapo'ná maní echi ba'wí mapu nijá mapurigá echi pagótami sinibí niráa pirélama. <sup>7</sup>Echi jaré mapu ikí galá nayúraliko, abóniko narema suwaba je'ná jeyiri mapurigá kóntami niráa. A'lí Nijeni aboni Riósawala níima, ayénachó aboni Nijé kúchuwala níima. <sup>8</sup>Chopi echi jaré wabé majáami walú kastigo 'yárami níima, echi jaré mapu ketasi bichíiko ayénachó, echi jaré wabé chati sití oláami ayénachó, echi jaré mapu ikí nakówaka ko'yáami ju ayénachó, echi jaré mapuyíripi chuwé bilétari yuwa kochíami juko ayénachó, echi jaré sukurúami ayénachó, echi jaré mapu ikí chokoba jaga o'wiké echi jaré amachíkalawami namuti ayénachó, ne si'néami echi jaré 'yékaka ra'ichami ayénachó; mapujiti ne si'néami je'ná jerigá chati sití oláami pagótami a'wátami níima echo'ná ri'lé riáblochi mapo'ná ne buchuwímana wílé ra'laka rajáami ju, mapo'ná we rajá echi asujiri anilíwami. Echali níima mapalí aboni auché osá suwimea.

### **Echi ne bukulíwami Jerusalémachi**

<sup>9</sup>Echali tamí yuwa nawali pe bilé echi jaré kichao o'wéala Riosi kapitánawala mapu pe bachánala nijeni riwali ibílipi 'yéname echi kúuchi sikolí buchí maníami echi ne wabé simírami chati namuti mapu kicháosa chokéami wabé risúu nílatali echi jaré chati sití oláami pagótami jena'í wichimóbachi piréami. A'lí echi bilé Riosi

kapitánawala tamí janeli: Echi Walubela Jesucristo echi Riosi níwala Méchuli ju. Wakiná tamí yuwa simí, nijeni mi 'nérama Binói upila, echi mapu bukúlí niwíami níili Binói yuwa.

<sup>10</sup>Echalí mapalí echi Wabé Galabé Riosi Iwigala olali mapurigá nijeni riwimea mapurigá ikimea waminánomí, echalí nijeni riwali mapurigá echi walubela Riosi kapitánawala tamí niráa echo'ná ne wabé ripabé biléana walubé chulichí. A'lí echirigá tamí riwírali echi ne wabé galabé walubé walúlachi Jerusalémachi anilíwachi, echi mapu ripá riwigachi jonsa rikínali, echo'ná jonsa mapo'ná Riosi atí. <sup>11</sup>A'lí echi walúlachi ne wabé ratábali achigórigá mapurigá Riosi Binói ne wabé ratábami ju. Ne wabé simírami ratábali mapurigá bilé taa rité ne wabé natéami, mapurigá echi jaspe anilíwami rité, ne galá machíami mapuyiri sipée ventana niwalíwami. <sup>12</sup>A'lí echo'ná walúlachi ne nologá ne wabé ru'náami niráa tigótami níili ne wabé ripabé, ayénachó echo'ná tigótachi nirúali makói miná okuá yéwachi, mapo'ná makói miná okuá o'wéala Riosi kapitánawala tibuka jali. A'lí echo'ná makói miná okuá yéwachi ibílipi niráa osirúami níili bilé riwá mapurigá anilíwami níili ibílana echi jaré makói miná okuá rojuáami, echi jaré Isaéli pagótami. <sup>13</sup>A'lí bikaná yéatami níili riwili mapokuá machina rayénali, ayénachó bikaná niráa yéatami níili a'nagú 'nalika niráa, ayénachó bikaná yéatami níili tuni mapomí bokowí rayénali. <sup>14</sup>A'lí echo'ná walúlachi mapo'ná nologá tigótami níili, echo'ná nirúali makói miná okuá o'weli rité, ri'lé bachá tigótami niráa. A'lí echo'ná ibílipi makói miná okuá ritéralichi osirúami níili ibili aboni riwalá mapurigá riwéami níili echi jaré makói miná okuá nawésami mapu echi Méchuli júuli nawisánala Binói Ra'íchala.

<sup>15</sup>Echi walubela Riosi kapitánawala mapu tamí yuwa ra'íchali, echi kami níili bilé kusí tétalawami, oro niwárami, mapurigá tétama echi walubé walúlachi, echo'ná nologá tigótami ayénachó, echo'ná nirúami yéwachi. <sup>16</sup>Echo'ná walúlachi sitóami níili. A'nagú kuwana chopi 'yékali níili. A'lí echi walubela Riosi kapitánawala tétali echi oro niwárami kusí jiti. A'lí okuá mili waminá okuá kiento kilómetro níili. Biléana ibílana a'nagú naóana kuwana chopi 'yékali níili, ayénachó a'nagú ri'winá chopi 'yékali níili. <sup>17</sup>A'lí echi walubela Riosi kapitánawala ayénachó tétali echi walubé tigótami. Ne walú chipériga tigótami níili. Usansa makói miná naó metro níili chipérowala, mapujiti echi walubela Riosi kapitánawala níwala tétawami achigó kilí níili mapu kilí jena'í wichimóbachi piréami pagótami níwala.

<sup>18</sup>Echo'ná walúlachi ne norigá tigótami níili echi wabé natéami jaspe anilíwami rité jiti. A'lí ne suwaba echi wabé natéami oro chopi jiti niwárami níili, ne galá machíami niráa, mapuyiri sipée ventana niwalíwami. <sup>19</sup>A'lí echi makói miná okuá o'weli rité mapu ri'lé bachá tigótami níili echo'ná walubé tigótachi ibílana niráa wiká nasókami wabé ba'yóratami níili, mapujiti echo'ná moba ritérali ochópana uchúcharami níili wikabé wabé simírami natéami kúuchi rité. Echo'ná echi rité ne bacháwala uchúcharami níili echi jaspe anilíwami wabé natéami kúuchi rité; echo'ná okoná ritérali uchúcharami níili echi sájiro anilíwami wabé simati kúuchi rité; echo'ná bikaná ritérali uchúcharami níili echi ágata anilíwami wabé simati kúuchi rité; echo'ná naóana ritérali uchúcharami níili echi esmeralda anilíwami wabé simati kúuchi rité; <sup>20</sup>echo'ná malíana ritérali uchúcharami níili echi ónise anilíwami wabé simati kúuchi rité; echo'ná usansa ritérali uchúcharami níili echi kornalina anilíwami wabé simati kúuchi rité; echo'ná kicháosa ritérali uchúcharami níili echi krisólito anilíwami wabé simati kúuchi rité; echo'ná osánaósa ritérali

uchúcharami níli echi berilo anilíwami wabé simati kúuchi rité; echo'ná kimakóisa ritérali uchúcharami níli echi topasio anilíwami wabé simati kúuchi rité; echo'ná makóisa ritérali uchúcharami níli echi krisoprasa anilíwami wabé simati kúuchi rité; echo'ná makóí miná biléana ritérali uchúcharami níli echi jasinto anilíwami wabé simati kúuchi rité; echo'ná makóí miná okoná ritérali uchúcharami níli echi amatista anilíwami wabé simati kúuchi rité. <sup>21</sup>A'lí echo'ná makóí miná okuá yéwachi, echi makóí miná okuá 'yera niwárami níli echi wabé natéami perla anilíwami jiti, ibili 'yera bilé perla chopi jiti niwárami níli. A'lí echo'ná walúlachi ri'narátachi echi wabé natéami oro chopi níli, ne wabé machíami mapuyiri sipée, ventana niwalíwami.

<sup>22</sup>Echalí nijeni ketasi riwali nibilé ri'obá echo'ná walúlachi, mapujiti echi Walubela Riosi ne suwaba omérami echo'ná atí, echi Méchuli ayénachó; echijiti echo'ná muchúami pagótami sinibí Riosi Binói yuwa ra'íchaga walubéraga anema echi Walubela Riosi, ayénachó aboni echi Méchuli Binói yuwa ra'íchaga waminabi walubéraga anema. <sup>23</sup>Echo'ná walúlachi ketasi 'wérali níima mapu echi rayénali rayenama, nibilé cho 'wérali níima mapu echi michá ratábatama echo'ná; mapujiti Riosi Binói ne wabé ratábata echo'ná walúlachi, ayénachó echi Méchuli ne wabé ratábata echo'ná. <sup>24</sup>A'lí si'néami pagótami mapu ikí ma ku'wírami juko, abóniko sinibí 'yénama echo'ná walúlachi mapo'ná echirigá rataba. Echo'ná ne wabé walúlachi níima mapujiti ne si'néami jena'í wichimóbachi nuláami o'wéala silíami ma ketasi waminabi mapurigá o'wéala niráa níima, chopi Riosi Walubela níima, echo'ná Binói walúlawalachi atíami. <sup>25</sup>Echo'ná walúlachi sinibí rawé ke siné 'yératami níima echi yéachi, a'lí echo'ná ke bilé siné rokogó níima. <sup>26</sup>Echo'ná walúlachi ne bachá walúlachi níima mapujiti ne suníami piréami o'wéala echo'ná sigá, waminabi walubela anilíwami nilama echi Riosi níwala walúlachi. <sup>27</sup>Ke siné nirúlama echo'ná walúlachi echi wabé chati sitíi namuti, nibilé wesi echo'ná mo'wimea mapu ikí wabé chati chuwé oláami ju, nibilé cho echi jaré mapu ikí 'yéka oláami ju. Echo'ná walúlachi chopi mo'wimea echi jaré mapu ikí aboni riwalá echo'ná echi Méchuli osilíwalachi osirúami ju mapurigá aboni sinibí pirélama Riosi yuwa.

**22** Echali echi Riosi kapitánawala tamí riwírali echo'ná bakochi mapo'ná simí echi ba'wí mapu nijá mapurigá echi pagótami sinibí pirélama. Echi ba'wí ne wabé simírami galabé níli, ne wabé galá machíami mapuyiri sipée ventana niwalíwami, tarapé wikúami niráa. A'lí echi galabé bakochi machíinali echo'ná Riosi níwala walubela asíbalachi jonsa, ayénachó echi Méchuli níwala walubela asíbalachi jonsa. <sup>2</sup>A'lí echo'ná walúlachi walubela ri'narátachi nasipa simí echi galabé bakochi. Ayénachó echo'ná a'nagú bo'onaga jawi echi galabé rakéami namuti, echi mapu nijá mapurigá echi pagótami sinibí pirélama. A'lí siné bamíbalí echi rakéami namuti galá raké íbílipi michá niráa. A'lí echi rakéami namuti sawala ku sa'wáami ju kanápuromí piréami pagótami. <sup>3</sup>A'lí echo'ná walúlachi tarapé nirúlama echi mapu Riosi wabé chati sitíi ané. A'lí echi Walubela Riosi Binói echo'ná walúlachi asimea, echo'ná Binói níwala walubela asíbalachi. Echi Méchuli ayénachó echo'ná walúlachi asimea, echo'ná Binói níwala walubela asíbalachi. A'lí si'néami pagótami mapu ikí Riosi piónawala niráa ju, abóniko sinibí niráa waminabi o'wikema echi Walubela Riosi. <sup>4</sup>Echalí aboni galá machíami niráa riwimea Riosi, ayénachó echo'ná íbílana aboni kowálachi osirúami níima Riosi riwalá. <sup>5</sup>Echo'ná ma ketasi waminabi chonama rokogó niráa. A'lí ma ketasi 'wérali níima mapurigá echo'ná piréami

pagótami karúmati rajema, nibilé cho mapurigá waminabi rayenama, mapujiti echi Walubela Riosi Binói galá ratábatama, echijiti aboni suwaba galá machíami niráa riwimea. A'lí Riosi 'yama mapurigá aboni ayénachó o'wéala nuláami níma sinibí bamíbali, ne sinibí.

### Echi Walubela Jesucristo ke 'me ayó ku nawama

<sup>6</sup>A'lí echi walubela Riosi kapitánawala tamí jeaneli: Je'ná Ra'íchali ne bichíwali ju. Galá níma mapu ne si'néami pagótami galá bichíima. Echi Walubela Riosi mapu galá 'natárata echi jaré mapu osá Binói Ra'íchala, Échiko júuli Binói kapitánawala mapurigá galá riwírama echi jaré Riosi piónawala suwaba mapurigá ikimea ke 'me ayó.

<sup>7</sup>Echi Walubela Jesucristo jeaní: ¡Nijeni ma ke 'me ayó ku nawama! ¡Ne wabé kanlíami ju si'néami echi jaré mapu ikí galá bichíiga nijéwako Riosi Ra'íchala mapurigá osirúami ju jena'í oselíchi!

<sup>8</sup>Nijé Juani galá námali je'ná Ra'íchali, ayénachóni riwali je'ná karúmati. A'lí mapalini ma je'ná jerigá námiga riwisá, echalini we yáati chokoba wilfbali bacháami mapo'ná echi Riosi kapitánawala wilili, echi mapu tamí riwírali, mapurigani o'wikema echi walubela Riosi kapitánawala. <sup>9</sup>Chopi échiko tamí jeaneli: ¡Ketasi tamí walubéraga ané mujé! Nijeni ayénachó bilé pioni ju, Riosi piónawala niráa, achigórigá mapurigá mujé niráa, ayénachó mapurigá echi auché jaré mujé ritémawala niráa, si'néami mapu ikí nawésako Riosi Ra'íchala, si'néami mapu ikí galá nijéwako mapurigá osirúami ju jena'í oselíchi. ¡Chopi echi bilepi Walubela Riosi walubéraga ané!

<sup>10</sup>Echalí echi Riosi kapitánawala ayénachó tamí jeaneli: Sinibí galá nawisá Riosi Ra'íchala mapurigá osirúami ju jena'í oselíchi. Ke siné ariwé nawesa, mapujiti ke 'me ayó suwaba echirigá ikimea mapurigá osirúami ju jena'í oselíchi. <sup>11</sup>Echalí jonsa si'néami mapu ikí chati sitíí oláami juko, abóniko sinibí niráa echirigá chati sitíí oláami níma; ayénachó si'néami mapu ikí sitífraga nokuáami juko, abóniko sinibí niráa echirigá sitífraga nokumea. A'lí si'néami mapu ikí galabé oláami juko, abóniko sinibí niráa echirigá galabé oláami níma; ayénachó si'néami mapu ikí nakíko olánala mapurigá Riosi chopi nakí, abóniko sinibí niráa echirigá chopi olama.

<sup>12</sup>Echi Walubela Jesucristo jeaní: ¡Ne bichíwali, Nijeni ke 'me ayó ku nawama! Echali Nijeni ibili niráa 'yama echi wabé galabéala. Echi jaré mapu ikí wabé galabé ologá piréaliko, abóniko waminabi ne wabé wikabé 'yárami níma; chopi echi auché jaré mapu ikí ketasi 'me galabé ologá piréaliko, abóniko ke 'me wikabé 'yárami níma. <sup>13</sup>Nijeni ne bachá ju, ayénachóni ma ne jubá ju. Nijeni ne chokichí ju, mapurigá echi binékowami “A” anilíwami ne chokichí ju; ayénachóni ma ne jubáami ju mapurigá echi binékowami “Z” anilíwami ma ne jubáami ju.

<sup>14</sup>Ne wabé kanlíami ju si'néami echi jaré mapu ikí galá bichíyami juko. Abóniko mapurigá galabé bi'wíami napáchami niráa ju, mapujiti aboni ma galá bichíili Jesucristo niráa. Echijiti aboni risensia níwa mapu ko'mea echi galabé namuti rakala, echi mapu nijá mapurigá aboni sinibí niráa pirélama, ayénachó mapurigá aboni mo'wimea echo'ná walúlachi yéwachi. <sup>15</sup>Chopi echo'ná machímana tibima si'néami echi jaré mapu ikí ke bichíyami juko, si'néami echi jaré sukurúami ayénachó, si'néami echi jaré mapu ikí chuwé bilétari yuwa kochiko ayénachó, si'néami echi jaré mapu ikí nakówaka ko'yáami juko ayénachó, si'néami echi

jaré mapu ikí chokoba jaga o'wikeko echi jaré amachíkawami namuti ayénachó, si'néami echi jaré 'yékiami pagótami ayénachó, si'néami mapu ikí wabé nakiko 'yékanala echi auché jaré.

<sup>16</sup>Nijé, Jesucristo, mani júuli Nijé kapitánawala suwaba je'ná jerigá ruyénala echi jaré wikabé napawika bichíyami ritémtami, echo'ná kicháona o'wéalachi napawíami. Nijeni ju mápuni niwáli echi walula silfami Rabiri riwéami, ayénachóni bilé ju echi binói Rabiri kúchala kúchuwala, ayénachó Nijeni mapuyiri echi wabé ratábami sopolí ju, echi mapu bi'yá chi'láachi machina.

<sup>17</sup>Echi Wabé Galabé Riosi Iwigala jeaní: ¡Wakiná simí! Ayénachó echi Méchuli upila jeaní: ¡Wakiná simí! A'lí galá níima mapu ikí námiko ayénachó jeanísá: ¡Wakiná simí! Ne si'néami pagótami mapu ikí nakiko bajínala, wakiná simíbaga tarapebi yiri natétaga bajisi echi ba'wí mapu nijá mapurigá echi pagótami sinibí niráa pirélama.

<sup>18</sup>Nijeni jerigá ruyé si'néami echi jaré pagótami mapu ikí námiko Riosi Ra'íchala mapurigá osirúami ju jena'í oselichi: A jaré napabúsagá auché jaré ra'íchali je'ná ne bichíwali Riosi Ra'íchala yuwa, echalí Binói Riosi ne wabé risúu olama echirigá oláami pagótami, achigórigá mapurigá osirúami ju jena'í oselichi mapu Riosi risúu olama echi jaré chati sitíi oláami pagótami. <sup>19</sup>A'lí a jaré waminá 'yésagá jaré Riosi Ra'íchala mapurigá osirúami ju jena'í oselichi, echalí Riosi Binói waminá nakubama aboni riwalá echo'ná oselichi mapo'ná osirúami ju si'néami echi jaré pagótami riwalá mapu ne sinibí niráa pirélama. Ayénachó Riosi ketasi risensia 'yama mapu aboni muchima echo'ná Binói níwala galabé walúlachi. Jena'í oselichi osirúami ju mapurigátamo galá machiboa churigá ju Riosi walúlawalachi.

<sup>20</sup>Echi Walubela Jesucristo mapu suwaba je'ná jerigá aní, Échiko ayénachó jeaní: Ayena, Nijeni ke 'me ayó ku nawama. ¡Echirigá níima! ¡We yáati ku nawá, Mujé Walubela Jesucristo!

<sup>21</sup>Nijeni nakí mapu echi Walubela Jesucristo 'yemi mi ne si'néami wabé ku'wírama. ¡Echirigá níima!